


嶧桐文集卷第三

序

癸酉程墨選序

貴池劉成伯宗著



二妙集五十一

往者歲在庚午次尾崑銅有程墨之選余為序之淋漓盡致  
 語不得休蓋爾時南國既首維斗而天如駿公臥子燕又孟  
 宏源常輩數十人舉同黨之士登賢書過半得人之盛前此  
 未有也即吾輩不見錄者亦數十人咸以額登有限年在未  
 逢樂天知命無怨尤不平之意介於幾微故余於選本導揚  
 休美甚盛事也今年癸酉吾黨得雋者數子然特止數子亦  
 云僅矣楚越齊魯閩粵尤希微焉嗟乎識者憂之豈獨一身  
 榮悴之感哉以故次尾科牘要予弁言予不能應余行卷名  
 篇選亦不得自序嗟乎難言哉雖然鋪張揚厲貢誣諛之辭

妙三十

墨

一

皆吾輩所不能也分別纖微清疏雅鄭仰鑽聖賢之語意按  
 以高皇帝之尺度其合焉者是之表章之以助為說于天下  
 苟其離焉雖有司所矜重舉世所奔歸吾辨之非之正告之  
 世使承學之士心手有所戒若是者則吾黨皆能為之皆有  
 所不得已于其間如戴子敬夫魯子孺發過余白門郎中意  
 念深矣常有以自下者余心儀曰此當有異已而敬夫偕來  
 吾見其至性惻怛一似重有憂者雖患難之言不出諸口而  
 意常浮動于鬚髮余復心識之乃二子者合志同方又能倡  
 致歷陽咸為立誠修己之學矣于是攬文事之猖披慨科舉  
 之失實慶然思救篇曰登音筆斷侃然嗟乎二子之說曷可  
 少乎哉夫士不得志則明道于天下吾之夙願也今刺謬于  
 堯舜禹湯以來之意乖忤四子之書叛裂二祖十一宗之法  
 淫哇啾嘈正聲散亂則道之不明孰大是矣吾于墨牘常異

避嫌怨既不能如敬夫決起而為矣有能為之如敬夫孺發者余復嘯嚙喉間不以一語張之豈夙願也哉夫導揚休美整齊喪亂皆吾黨士也有為之者宜有言之者余又奚辭焉

楊維斗稿序

余交維斗幾年矣維斗今日而舉舉以第一人天下之士徒相慕悅者望洋而歎莫得其所由來余敢不悉維斗之所以正告同志使敬聽焉以知所冀式與蓋維斗之制義非文也其躬行之實見之言焉而已然未可驟而幾也當天啟酉戌中讀維斗諸作豪傑之氣盡見楮墨閒則吾聞維斗時方慷慨倜儻指畫天下事痛如切膚蓋堅毅有為之志立矣甲乙以後益深宿于聖賢之旨沈湛六藝之文其于仁義道德明倫端矩之說三致意焉猶飢渴之于飲食誠然者爾是故忠貞萃而歎發于聲悻逆張而義形于色推賢樂善則神聽其

妙三十一

二

和平含垢匿瑕則交全其終末此皆維斗之所為在人耳目前者故尺幅之上有形見焉不可誣也乃者杜機劇采藹粹冲夷散為制義皆大呂之響而光發于堅惟質有之已矣凡此者內外具見所謂躬行之實見之言而未可驟幾者此也使維斗數年前率然一第去豈不亦稱雄制舉冠進賢有聲而顧至今日乃售豈偶然與夫功令三年一取士維斗即第一人前乎此者有矣後乎此者又有矣苟非維斗雖啗之鳴引聲中律恐未足以儀世瑞國而厭服當世學士之心使之延頸舉踵嚮風而從如此夫學者徒相慕悅以為第一人之文如是而不能推其所由來可乎哉

李源常制藝序

余邑中望族蓋有濬源李氏云李之顯自方伯戶部兩公始嗣是舉南宮登鄉書者纍纍代不乏而又多大賢君子之徒

其二先生懋勉人倫敦崇古道爲當世師者斯即不科名而傳者也而乃今以源常特聞源常方年少生當族大而寵多或教以羣相穉者勿應顧獨奉其嚴君之教蓋嚴君淵懿端靜好沈湛讀書人也源常用是閉門卻掃即族子無或見披誦之勤達旦爲率時聞歌聲出戶外斯其伸紙疾書罷焉矣源常爲文近所愛慕勤切者西江則文止大力大士數輩吾吳則天如維斗駿公諸子每諷詠其文徧友其人以爲快以余之獲從諸君子游也則亦與予妮好甚或稱引諸君子之篇以相難或詳其讀書制行之概以自益凡此皆源常所以自拔於流俗而卓然自命不苟者今乃受知於賢執事矣夫一日之知積素之誠然者之相感也豈苟也哉攬源常之文鬱鬱芊芊氣浮楮墨殆所謂精神大於身要其源流本末可考而知也夫物好得朋而事連所類固宜與維斗天如駿

妙三

三

公同升聖世而余亦樂得而道之爲騎驛其閒也

國風序

古之君子坐一室之中常志周乎天下殊方隔域山川謠俗之數貞淫沃瘠盛衰遷化之端莫不指數區畫縮萬里于掌上也是故先資之言由之以出異日者補偏救弊應節隨方而功以必成豈偶也哉文章一事于德與功處一焉今日之舉子藝又于文章處一焉然以憲章王制而導揚聖賢之微言因之以爲名卿碩輔之地故吾黨近日切起衰之志未有不盡心于斯者也武林張天生于越中號端愿質素神情蕭散若不與外事相關乃其心營四海嘗欲舉古帝王辨方經野定賦一俗之道次第講求以爲太平可望而即見端于舉子藝其持論之意大約以吾治其精以教天下之粗天下不勝教也合眾多之所爲雜然並陳之亦可以自爲正矣蓋一

方之論不足以救濟天下察千變之容而各為之所是以所為而成扁鵲過邯鄲為婦人醫入雒陽為老人醫至秦又為小兒醫夫亦觀變熟而風土之宜詳救濟之道得也抑吾之于此敢苟然哉王風莫盛于二南而何彼穠矣之什疑在平王以後衛邶鄘淫僻傷敗而有婦人之詩六皆止于禮義而不過吾所以求拔萃之才不使以鄉國受累而又不至如崔饒州之服石鍾乳如子厚所譏云云且夫以文繫人以人繫地振古如茲龍門扶風而下有名地不名人者矣此皆漢有也吾別白出之而後世稱之地從主人則皆我明產爾亦以昭國華也積此數端而國風之選成蓋天生之論若此亦以見其勤苦周至矣嗟乎古之君子坐一室之中未有不如是者也天生獨治文事哉

陳大士易鼎序

妙三十

四

陳子大士既鼎南宮以假還里取道金陵探篋中所得錄諸同籍治易家言授之梓而屬曰必我友者伯宗為序而行之時不佞城亦以論文故將至先後數日不相及乃緣大士指而序之曰漢儒治經各有專家其專治一經各以其師說終身不易故雖疏釋精勤而廣大變通或渺矣然漢儒之功卒不可誣我明陳大士治經不名一家淹通條貫指及闕渺每說一經諸經來會天下承學治專家者皆師之大士之功亦不可誣即以舉子藝言國家功令習一經而已今上甲戌所賜進士則兩人特異顏壯其之闡牘五經畢對其舉于鄉也亦然大士則所治諸經篇成數萬著書滿家齊于淵海蓋自祖宗設科以來為舉子藝者篇目之富未有盛于此者也然吾因是感歎人才之不相及豈不太甚矣哉夫功令取士止一經使人簡于所事得以精治而肆力其中今也不然方游

里塾時四子之書稍取誦說督課欲中程及所占經塾師或非素習強句讀多謬誤則姑漫聽之先聖至文聊得記影略閒至足矣學宮所頒差有訓注故度閣之不必觀也又何問諸儒及繩墨之外乎且夫取士者固無庸此爲也郡邑學使之試無齒及此者所取士已在高等則教爲補作萬分一人從試所爲之羣笑其迂鄉國之推擇南宮所舉逾不恃此但具足成數刺刺長言勿遂已視行閒閒有所命題中字即云敦治已甚主者爲誇辭如吾易則致梁邱施孟之舉輔嗣康節之稱或遂以爲過之矣他經率稱是嗟乎祖宗欲以專經得士之意其效固如此也大士何自苦爲精于所事而又兼他家謀之大士何自苦爲雖然事會之流相激使然不有軼才絕學如大士者出則我國家經術之盛將遂出漢宋下哉乃大士所哀同籍易文抑又異矣人皆盈尺之書篇多希有之論即如吾所感歎安得此纍纍者或氣勢所至不同昔時吾言妄未可概信乎或曰大士壯其雖兼治諸經其起家皆以易壯其之舉于鄉所不至格不得見主司者皆從其初以易名也夫二君之于易抑又深遠與若是則大士言之矣易爲五經之原陰陽先于人事伏羲先于堯舜諸聖也且試觀大士之于易其廣大變化何如也大士計偕去來道中撰述遂成帙併出以教世名之燕草附行

遵法集序

以科舉之途行之將三百年名卿杰士輩出其中一日請罷非法也然祖宗所以重經義求人才之意大旨炳如今有司所貢不必其所以拂經叛理鄙倍而無當者往往然而克自敦琢以求副乎祖宗之意者或擯不錄則亦非法也又士或修辭矣金玉其外中格據上第矣問所躬行視先資之言背

反衡決無一相應豈其教欺與則益重失祖宗所以重經義求人才之意又非法也今以一法繩之進必以科舉也科舉之文所登進者必粹精爾雅醇乎聖賢之理道昭晰乎帝王禮樂刑政之全規矩乎比偶之式非此不獲雋也既雋矣向所言仁義道德安上治民之語刺刺紙上者身果有之即不能無毫髮差然皆彷彿得其似若是則大善矣然祖宗所以用科舉重經義意蓋如此而今之奉行者果恪然一王之大法也精修其事不愆不忘以是致治何更端為友人孫淳曰子之說未盡也予所云精修其事者徒言之易卒未必爾夫選舉是一法也自有天地以來明明揚側陋言揚行舉二帝三王稱烈矣太祖高皇帝不嘗徵天下賢才為守令乎不嘗罷科舉舉賢良乎不嘗富民素行端潔達時務者乎不列舉聰明正直孝弟力田賢良方正文學術數之士乎不令科舉

步三十

六

薦舉並行乎是一法也成宣列聖皆開行之熙洽久而功名無庸見執事者樂糊名易書之制可以遠嫌疑而束才俊畏避保任徒相幸于不可知謂彼此可以無患此亦非法也今明天子銳意太平修舉辟選故事愚謂賢公卿誠承上指盡心其間妙簡善任以課成功俾與科目並行既使選舉之法復則人樂為善不敢恃空文華說以倖爵位遂悍然為非而又以椎樸不以文字起家者反辱恩拔擢使之圖尺寸則忠義廉節之事或有多有所見又使科目之人以為吾素所號說道理著文采者我所樹立豈可出彼草野固陋下則科目之途將大競于光明俊偉謀王斷國之略次亦端謹靖恭不敢過自決裂為選舉之人所形較如是而後善矣是皆所謂法也以此求合乎祖宗用人才致盛治之意斯科舉可不罷而不復使人有罷科舉之請予所云未盡也其言如此余心竊

之無以難第曰吾與子方治科舉事姑畢此役無多談且皆法也求無負祖宗意則可矣語曰徒法不能以自行又曰有治人無治法是在遵之者哉是在遵之者哉

沈治先詩義序

余幼而受易長而汎覽諸經意有所得輒欲效箋疏傳注之業而才力不逮又為諸生日亦不給焉顧且旁治他家時作制義蓋不欲沒吾箋傳之本心而又以安吾舉子之分嗟乎事與志違亦云可慨矣宣州沈治先敦于詩者也當其在童丱與兄眉生同受易又別受詩蓋思自名其學取為雷同意固遠矣其治詩不苟坐于一室中析毛鄭之疑斷齊魯之獄義類名物所辨者微乎若息即無論刺謬顯著者也至其稱詩為文必曰溫柔敦厚是不悖于詩之教云爾吳中子常麟士最為攻于詩者其言曰詩有詩位又有文位論策之制戾

妙三子

七

于和平詞曲之微傷其麗則雲閒臥子諸君緣情綺靡則又仿古作者嗟乎攬治先之篇不亦助為說于天下哉今諸子經學甚盛既各治一經又合以諸經治一經而余皆得從之游以往復其議論齋油素而籍記之歸而與眉生治先坐一室取折衷焉然則箋疏傳注之業余未即已也哉

左子正制義序

桐城左國柱字子正故太中丞今贈太子少保左先生光斗長子也當天啟之季逆黨盜弄左先生與其儕十數君子首被慘禍天下聞而高之先生立朝大節世亦既知且見矣而桐川里居與敝邑距衣帶水余知之尤悉聞子正嘗讀書山寺去家二十里而遠一日見冥色矣子正之讀書所念晷晷不繼意將借款段疾而馳先生命之曰何騎為勞筋骨習勤劬女事也澹泊寧靜此其一端何騎為子正奉教惟謹遂持



襍被徒步昏夜中至發篋習所課業則雖初號矣蓋先生所以教子正者如此余生少賤不及事先生然得從子正游又得盡從子正里中諸名雋游其有高簡樸略蕭然布素不習爲富貴之容如子正者乎余嘗對子正太息曰自子之先中丞死而中朝之禍甚賴今聖人廓清之自子之先中丞死而縱川之亂作有亟砥迴之者誰與是必秉禮守義修潔自將敬其長老高軒不時御下車入里門約飭狎客蒼頭奴無或鮮衣怒馬爭道上者與蓋子正澹泊寧靜本之所生而深以學問其發爲文辭以理馭法以道裁情帖括中諸詭故不經之習夷然勿屑者豈徒自寓以留先中丞風烈也合其伏闕陳情諸疏讀之嗟乎子正于是爲孝子矣余方哀集中丞公同時僂死十數君子制義板以訓行以爲治舉業由科目進者自有如此人學士家所號稱讀書明經術者此是也立身行己垂功名于來茲豈必在帖括外與而以魏子敬之文附以子敬亦既死余不阿生者也子正諸制義天下有同識必不謂余諛所知交者故不辭爲序而傳之

出門偶集序

丁丑之夏坐一室忽忽無歡會陳士業從豫章來過我信宿與論古今政治得失之故人才興衰消息之所以然傍徨喟歎蓋夜分不成寐士業曰吾與若浮沈舉子業幾年矣於經傳遺文即不無小補顧今天下事棘須才甚此何能爲吾將出而圖吾君夫吾出而圖吾君凡農田水利戎卒城壘扼塞險夷之區別與夫夙昔同志號稱賢才大之毗輔翼亮小亦捍守撫綏今散處川谷間徘徊未起而爲吾所仰須之友也之數者其在三輔九邊兩川百粵吾待明年若夫舊畿吳越遠不至三千里者吾嘗過焉問焉交焉語焉矣今再往復之

視昔所見聞有增損乎于吾居恆籌畫所以爲之者當焉否也子曷不偕我游余既欣然願往于是士業輕帆先下約相待于鍾山後五日余繼至余之游固以士業意然兩人所至輒有逢迎其好我者率以舉子藝故常即次未安而文章積于几上旅人得此至惠貺也方在鍾山時吳楚秦蜀之友有挈余載書盟者分韻賦詩而後羣以其舉子藝授曰子財取其閒必行之世余不能辭而來者益取已而之吳門吳門亦然之湖上湖上亦然蓋是數地固皆東南一都會也四方之才翔集其境而文字之樂有加無已每留許日輒得數巨麓快讀之暇因哀輯之各繫以所從得之地而名之集維時道中多聞異論使士有爲善之懼故去來頗卒卒意所擬一游止者反未至或至不能待則吾友之文遂闕佚是吾所甚不樂也乃復發篋笥取其精要略載之篇有部分曰鍾山曰吳

妙三子

九

門曰湖上是某時某地所有之文不繫其產也曰篋中者非某時某地所授受而其文故在吾枕祕久吾以當宗少文游錄也總題曰出門偶集以余始與士業約所願徜徉吳越閒者意不在此而此集適成蓋偶然云雖偶然乎易曰出門交有功古之君子鄙闕觀之陋于女子而求勝己之友以自輔益如此又曰出門同人又誰咎也蓋渙小羣成大羣無方隅門戶之說以機筭賢人才士而偕之蕩平正直之塗今天下事棘需才甚是二說者亦曷可少哉初士業語余是行也茂先次謙約偕來不果今得子而快吾將夸言之遂由湖上趨桐江富春山得過返而余以授梓金閭取故道自鍾山沂大江歸云

燕臺集序上

戊寅冬余始游燕市值

畿輔戒嚴書生無事任雖憂

心京亦莫適與言也惟是夙昔同好以文字遙相唱和者爾時咸得謀面論文之暇旁及邊關形勢戰守機略頗悉所未聞蓋我友生長金臺目熟情事視伏處東南揣摩臆說者不同也猶記最先晤語者吉士吉士以余至告之同人則公狄析木敬哉時過從焉已而介伯至已而惟調來會于漫園已而若侯會于公狄所方余始至即問若侯所在公狄為言出游近畿阻不得入諸同人皇皇欲以計致之不果

三四日一至書賈所訪未見遺書或閒日一操觚習吾舉子業以故諸同人制義時時來几案閒南還之前一夕諸子觴余于楊園則彭仙兄弟又集矣是日以余離別諸兄弟乃有慷慨悲歌燕市酒人之態余遂再載諸文而南是燕臺集所自起也

妙三十一

燕臺集序下

先是余出門偶集流布京國吉士公狄讀而樂之一日謂余曰子居此吾燕山奇文聚子所矣是亦一集也曷為我表之余頷其言因念往者出門義例以某地所得之文繫之某地不繫其產也于是南還簡橐中文都為一集蓋吾南之友先余至都者陳吳昭馮躋仲後余至都者周二為三子所操皆吳音樂安孫伯生吉甫家有直節名臣而顧以文字遙擲余廣平申孚孟學自庭授而亦教我以高言皆吾一本之學又一快也因哀輯之與諸子文並行公狄以新得意賈人欲別出為解元稿余笑而從之人不可以無科名如是夫

梁公狄稿序

近代北畿榜首以文章氣節最著者無如神廟丙子之魏崑溟允中熹廟丁卯之金伯玉鉉崑溟同時南元為顧公涇陽

文名籍甚而公已肩次之後抗疏言事與鋤山名理爭高矣伯玉弱冠領解額文號爾雅而直聲亮節震動一世天下聞而慕之若耆舊不知其齒未壯也余入都門風塵游處惟是同志之士尊酒細論亦惟是文章氣節為敦勉吾于岳季方而外再屈指相勸進者兩解元是也今公狄裒然首舉矣公狄年二十餘容止秀美望若朝霞所謂富貴吾自有也此宜早達與伯玉同即其文章之氣蓬蓬勃勃而又絲理密軋動合古人至顧劉瀏亮壯其政蔚有如杜甫所美舞劍器者焉今天下多事若如羣袂策者既鹿鹿蔑有樹立復塞嘿相戒無一言徒取高科大官去豈公狄鄉先哲之教而又豈公狄自命之指哉公狄析木詩歌古文並自超軼藏書萬卷日坐其中直與身等夫讀書以明理理足則氣生吾知公狄所以後先繼起者端有在矣

妙三十

士

王升如時文序

神廟末年士大夫無憂國之心邪正漸淆是非莫定時滇南王先生聚奎宦給諫獨起而爭之侃侃不阿疏數十上直聲震一世其與為唱和者二三君子而已余方童子耳王先生名如子瞻之以韓范富歐陽問塾師者年來栖止白門朋好畢集戴子敬夫則尤推首王升如洎獲交焉則固王先生長君也先生樂鍾山之勝留家此中遂隸籍云升如在諸生方年少然嗜古力學篤氣誼喜交游素心亮節已嶽嶽有父風余昨歲去燕市贈行以言有痛哭入承明之句余嘿嘿往返至今愧此語然升如懷抱可知矣閒時問以揚用修成漢事則為迹父老言甚悉鼓掌頌足以出之蓋重有感歎于其直節危言者即升如寄託可知矣古人志潔則辭芳行修則言立升如每擲管兢兢乎聖賢之理道矩步不敢失也然而沃

其根者枝葉茂焉是故其旨遠其辭文殆踔厲乎作者之林豈韓所云應酬文字哉浙少司空劉先生宗周今之魯靈光巋然獨存者也喜升如能世其家學輒書扇勸勉升如奉為弘球嘗屬余跋以為厚幸今又得序升如文讀之夫城不獲侍王先生游乃序其子之文牽連傳合以當執鞭其愉快何如乎

方爾止易稿序

桐城方爾止少負雋才如昔人所稱沈博絕麗者始攻詩治古文辭專家矣不數年盡棄去獨講求名理所讀皆通書啟蒙近思錄之類為舉子業則益用學宮大全說繩引先儒矩步往詰四方人士覽其纂著若者年長者不知齒未至也世受易以此起家爾止守先儒之學則治易尤力網羅漢宋諸書斷以己意象先繫表幾幾乎旦暮遇之一日手其六十四

妙三十

三

卦全爻文授余序余讀之卒業曰大傳有云易之興也其于中古乎作易者其有憂患乎此言三古四聖也即以我明論以易藝論洪永定科成弘修古至隆萬之季而勦說膚陳排比中遂絕象變筮占之學斯豈復有易乎今上稽古右文重經術攷象數旁及占驗小道不廢搜求下遂有窮經析疑如吾黨吾黨中專精厲意如爾止者折衷王何揚推周邵使帖括一途猶得存剛柔時位于萬一此亦易之興中古之說也夫使爾止徒欲以易應科舉為禮部體竊上第去奚用此者懼微言之將絕閔大義之不傳悼顓經者汗漫靡做而失祖宗明經取士之意也故為之推明于帖括如六爻諸文夫豈曰文而已其初其上其中四爻或難或易或遠或近或異或同之故明白備見不越尺幅而有李鼎祚集三十家之勤勞爾止功茂矣然推其始憂思悲憤而作六十四篇此亦憂患

之說也哉或曰時文小技子張之已甚嗟乎占易非徒避羞也聖人以承羞動之明易非以治文也文成而易道以顯司馬季主一卜者耳尚能與人臣言依于忠與人子言依于孝以有所發明感動而況遵王之制為致身之先資者其于易道興廢無繫屬乎

官子制義副鐫序

國家以經義取士蓋以聖賢理道之蘊古先帝王禮樂兵刑之實士既以講貫而身有之又見之言辭焉灼然可信矣是以登進之才諸位授以民社疆場之寄一旦有事取諸其懷而用之不更設也近者中外騷然大自秉鉞專征下逮郡邑之長無能廓清摧陷撫綏窮黎以上報明天子者咸謂經義之效如此玉卮無當薏苡髮用故易以科舉外別開用人之門是矣顧余思之今之以經義進當事任者非獨

妙三

三

其居官非也蓋其經義固已非矣滔滔者流膚勦庸劣甚者叛道離經無一語當聖賢道理帝王禮樂兵刑之實而執事者不察盲昧因仍轉相推進遂釋褐當事任耳其先資之言既已如此而望以戡定著勳得乎哉黃州官子凝之屈首經生當盜賊入境居圍城中毅然登陴任守禦出奇制勝談笑解圍卒保全城邑活生靈無數有才如此張詠虞允文之亞也父母之邦見一斑矣今茲急才要在救時崇濟以需一旦之用此何必以科目進以經義顯乃凝之經義則又深于理審克于法博綜于古今情事時勢機略靡弗條貫如松下吟如果石山房稿如廬山藝如棄草如潛居草皆在入誦說聞者也其中有確然復古者張子爾公定若干篇鐫入貴希函集復彙其餘合西塞山近稿為副鐫行于世記曰為天子削瓜者副之注曰副折也以有用之文而期以薦之天子則副

之可也夫大才不期名身期名世大言不期可說期可行君子講貫道理而身有之又見之言辭雖制義固灼灼其可信哉余庚辰人日過凝之白門時病新起羸不勝衣坐不能多語獨指謝公墩周處臺三歎息焉嗟乎讀凝之經義其知此意哉

方密之易義序

余治易好為象數占變之說又好講圖義顧學士專經家無及此者日與子鑾布卦陳畫私相擬議而已同學中吳門則許孟宏孝酌父子講此每有勝義皖桐則方密之特言之皆治京焦陳邵諸家觀象玩占之學非舉子輩應有司尺度之言也然獨密之遂以易登上第矣密之才高學博凡天官地志陰陽五行筮算諸術藝無不精此非以為易而皆于易有涉者是以于易號折角即以治有司尺度亦所謂擬議以成

妙三十

西

變化者也又焉得不當執事意哉史稱匡衡以不中第故經益明習衡真鈍夫與余同若密之豈須爾乎密之易文甚多此其近作蓋亦歷險阻處憂患朝乾夕惕有危平易傾之思焉鑑在曰密之近著離經小辨是十三經注疏也于易見端于易義見一斑云

擬彭澤父老送邑令陶公致仕序

我國家既殄巨盜景命維新則潯陽陶公來宰敝邑清靜寧一惠我無私吾儕小人方德之甚乃抗志抽簪賦歸去之辭輿人傳頌繫駒吾策也計明公蒞事才八十日耳敝邑褊小簿書省甚送往迎來經時無有有亦無過苦者明公聊酬酢之何遽揮印紱為古者七十懸車今強仕之年駕言終老不夫早計與蓋聞明公稟姿清勝棄遠振塵含雅吐風引觴紉菊殆有以自樂者昔被推舉為州祭酒體高而事逸亦少日

引去不屑屑焉其不肯以下邑淹明矣明公之來不挾一力  
今茲之去葛巾脩然即所種公田稅既未熟秫亦不收三徑  
之資垂橐無辦視士大夫以官爲家而厚取乎民者孰可恥  
也抑聞明公雅志君夫人有同於陵偕抱瓮之朋吳門解低  
頭之諷撫茲羣兒酌彼新漉明公之足已無求則已審昨雖  
未非今豈不大是也哉必以引年未合須二疏之賜金乃以  
露濡妻子燕衍田園亦未矣吾儕小人所不釋然者明公曾  
大父勤勞聖代殲厥大憝至竹頭木屑咸所揀料明公獨離  
事自全有懷高尚即至德可師清識難踈胡忽然當世也今  
王室再造弼亮得人而中原未一微風可搖世啟功名之會  
人多景附之思儻明公不鄙敝邑需次洊登將秉政立勳光  
于乃祖顧脫焉如遺塵比倦還之鳥何哉若是則君子所爲  
眾人不識吾儕所見燭中日耳而明公深遠矣明公家里在

妙三十

五

近巾車難回敢以言贈布茲奉拳

世傳鄭端簡公曉登進士將廷試董學士玘攜制策題及

擬彭澤父老送淵明致仕序令爲之云出首揆揚石齋意

端簡以初入仕路不宜呈身宰相辭不爲余以鄭恥埽相

門爲佳事送淵明致仕亦佳題遂代擬一篇按潛本傳年

四十謂所親曰聊欲絃歌以開三徑因爲彭澤令至其卒

時六十三在宋元嘉四年朱子已特書之綱目逆數而上

四十時正晉安帝義熙元年也時以桓玄伏誅安帝返正

故改元義熙潛義不仕宋必痛憤僞楚小草一出亦快玄

誅而然桓滅則劉勢逾成寄奴之醜從此日熾前人有

辨題甲子者云潛詩自庚子歲即書甲子歷至丙辰凡十

七年至恭帝二年庚申宋乃受禪是在劉氏未篡二十年

前已爾何得云入宋後不稱永初元嘉也此說固是余謂



知幾其神視于未見況事勢已成灼然可料者曹操破袁紹漢獻自在也謂獻尚能漢可乎司馬懿滅曹爽魏芳固自若也謂芳尚能魏可乎劉裕誅桓玄晉安固自若也謂安尚能晉可乎且晉之亡形已決于隆安之愚暗與道子國寶之貪橫致王恭桓玄一再舉兵向闕玄亦亡晉裕亦亡晉不待義熙也梅福逃王氏已有形聲淵明至庚子吾有嘻其晚矣之慨何云早計哉至彭澤父老語要似知淵明又似不知淵明要似知興廢又似不知興廢晉宋閒文格亦欲近似之存宗氏自記

吳母舒太君六十序

自次尾以文章名一世而秋浦之吳為天下往自次尾以身殉義而同邑里者避高田為不祥夫其往也為嚮其利其避也為忱其害則豈惟天下與同邑里者雖族姓亦有之而次

妙三

末

尾有親將盡而桃之弟曰筵而字山賓者獨與一二子嚴霜不渝其色風雨不改其音莊事邱嫂俯掖遺孤視不佞城子變閒行郭解之門搏顙魏澤之側俾巢有完卵得就句讀者實同心焉夫山賓之受教次尾也深辱與城與鑾游也久讀書好古日治三代以上言點畫波撇皆將凌斯邈而追蒼籀意以為吾摹古之貌則思循古之立是故執誼不苟而亮節有終宜山賓所優為勿難也乃鑾進而語余曰是蓋有母教焉鑾乙酉夏攜婦子入高田從吾師所徙山賓舍既遷寢室以居我矣堂階房闔靡弗整潔也旦夕薪水井曰靡弗備具也夫鑾旅人也多所假貰夫山賓寔入也何以克資給之勿有缺也勿有倦也則雜佩之既盡而劉薦繼之從容條理咸賢母之是為矣然高田一二子之所語益詳曰山賓尊甫知難翁攻苦力學不問生事則績紉佐讀惟母之勤知難翁數

奇不早達嘗為里中授經束脯無多而滄澗有旨貧而能樂亦惟母之勞迨翁齋志沒家徒壁立耳而兩孤覺然不能以旦夕亦猶今日次尾先生之遺二子也今山賓學日以植業日以勤又以年少經明為教授師能以古義自抗誰一非母賜哉山賓曰吾族子之稱筵也謬其述吾母則不誣矣鑿以是悉舒太君賢不羈于作客高田知之也今丙戌仲冬為太君六十辰則請以侑觴之辭稍著懿行俾有聞于後世幸甚不佞勿敢辭遂為序次如此已又歎曰使次尾而在首舉伯雅不有瑰奇偉論與而不佞卑之乃爾雖然山賓詩學少陵畫師摩詰當自為南山之圖率新婦手菽水作嬰兒戲跪進之樂何如者雖三公豈易此哉

劉母桂太君九十序

自今日而泝之六十年前何世也文恬武嬉兵革不試雖非

妙三十

七

上理亦云小康今耆老之生其時者多矣類能言之又泝之七十八十年前何世也民殷物阜道不拾遺化成中古俗號大同今蠶齒之生其時者不多然有矣亦能言之又進泝之九十年前何如哉周成康之世未遠漢文景之象猶新氣厚時龐風淳道固然而世雖可論人則罕徵吾欲問今古之懸殊訪禮樂之代謝其誰與是正哉而吾宗引之母桂太君實今年十一月稱九十上壽云方太君之歷七十八十以及今也侑觴之言稱述懿行亦既備矣語婦德則事舅姑以孝處娣娣以和相仰惠公以莊順者云云語母儀則育如心如己子督引之若嚴父畜臧獲以慈幼者云云是皆散辭也論其偉識則于猶子中若早識奉嘗公為名臣而思遇獨至迨奉嘗以廷爭重譴而命引之事鱣橐盡恭敬不衰引之始以貢舉計偕垂得顯秩矣而逆歸以奉太君晨夕又以別駕授選

部可以之官矣而弃之不顧是雖引之篤孝乎實太君時稱古誼曰知女以善養不知以祿養則有以教引之使然也吾進而奉觴退而重有感矣夫太君九十泝其設帨之日固所稱成康之世未遠文景之象猶新在朝在野往往而是雖不能盡人皆然而大家德里得天之厚者時則鍾之或為名臣或為淑媛俾其純嘏備至如太君者來嬪仰惠公以引之為子以奉嘗若失輩為羣從芝蘭繞舍簪笏盈牀既非易事矣而又篤其生為岡陵松柏之久久坐閱滄桑身當文獻此豈近今淺薄之氣所得有者使引之非砥行立名遺榮抗志如今日即佩玉珥貂焜燿康爵豈有當太君指夫試泝之九十年前何如而易稱此觴乎哉

陳母姚太孺人六十序

城不肖辱與陳子伯璣游義均兄弟則姚太孺人吾母行也

妙三十一

大

太孺人壽六十城宜手滄漣跪進介福之辭適伯璣以避地奉養子舍在客所城亦移家敝邑之深林不即相聞既後期矣乃克暮言以祝先是南昌陳士業修古而慎許可常為太孺人五十序瑰璋驚竒城愛而信之已與伯璣交甚深又十年所閱歷殊異而母德益章然後乃知今所以頌太孺人者非常辭例也城惟無文第舉大端言之夫甲子以六十為一週此六十年中身之苦樂世之治亂前後推移必不能一致惟明理信道者安其所應得而恬于所至當則神全而守固顧須眉男子多感易焉以冀笄禕之流其有幾太孺人之相先侍御公也當逆璫醜起黨籍勢成侍御公疏斥阿保閹人之奸所推舉皆海內名碩如吉水鄒公南昌劉公關中馮公輩正魏豎所側目豈不知言出而罰至哉時太孺人預聞擊奸之志不以兒女語相勸沮至侍御公果中擠排勢岌岌而

升沈不動樂若固有斯以為人所難為一矣當侍御之弃伯璣伯璣稱藐諸孤也伯璣五齡誠藐孤矣他姬侍惟賞財是問太孺人獨取圖書守之日抱伯璣而授之經簡手澤之書指示之教以無忘乃父志夫一未亡又當存沒之交攜持弱息徙盱江而去俾就外家其時事可見太孺人不教不諱茶苦如飴若無一事者而伯璣遂以成立如今茲斯以為人所難為二矣尤有所難者伯璣天下才也書讀等身詩成續古而又內蘊機略外總羣材頎然經濟吾曹推首焉苟非時移變起翔天衢而施大用矣今雖色養無虧甘麤有腆顧浮家江畔類旅人明夷之行無乃非夙志所許而太孺人又安焉無幾微聞伯璣不以伏處為卑太孺人不行遯為左語皆正訓依之恬然是又豈易言者哉顧嘗推論之富貴而可求不易于客魏之徑竇也而太孺人有閱歷矣患難不可處不

妙三十

五

難于始未亡之艱危而太孺人有拮据矣六十年中興衰得失亦幾經焉以其小者類其大者則今日所尤難亦人自難之太孺人率其素履往爾昔日抱伯璣而訓大義指固如是是足已無待而矜飭勿庸又奚難之與有他若勤恭慈儉所以贊侍御公易太君與夫物身逮下諸為細美無煩悉數矣夫人明理則守定定則神不亂營神不亂營則氣足光葆而可以立命可以延年仁者靜壽理固如是士大夫多不靜則其效難見無疆之引意將于太孺人徵之哉蓋回思士業稱壽之時年運而往又以加十使非經涉世變至今日誠不能推論至此又使非後期而言而雜然並進于設悅之晨則頌象服魚軒諸顯榮者滿耳幾何不以理明守定之言與冠遠游駕五龍擘麟脯之說同笑迂誣也敢即以此博太孺人一微察乎

醫者甯君七十序

甯故馨城望族科名文學趾相錯也而端所君獨業醫其為醫即又投七立效所至男女老幼倪德之甚邑長吏奇其術欲榜旌焉而君特謝卻之浮沈隱約生活人而無德色殆全乎隱者與余雖未面君而君之子峒從余游故悉之憶余與峒極論經義嘗遠引勞撫因及扁鵲倉公事余曰之二人術則精矣要未聞君子之大道也夫越人蓋好名而急利者意差愈焉而亦不能無市道則難乎免陰陽人道之患矣夫隨俗為變醫無恆稱君子羞其趨時之亟身造宮門以自銜見疑于中庶子而固求售益甚自輕矣一妖夢之故受田四萬畝賞抑何汰利抑何贏與以此推之他所致貨可勝數與夫淳于氏名著矣醫門多疾何擇于人而舉所治驗或王或王后王子美人王侍者它亦中尉中大夫中郎王姬兄丞相舍人

妙三

三

類何專多貴游與豈以位高金多足相推重他無足吾溷與若此者皆吾之所未安也吾聞端所恂恂長者人以病來無貴賤治之無不誠病而起者以值來無厚薄受之無期望居恆了不異人而求治絡繹蕭然食貧刀圭亦不倦君誠隱者于是乎深遠矣余自識事來見市醫之黠者咸結長吏鑽貴官以謀利而其術則先交于胥史左右酒食錢幣日輸若輩家聞新除官至徒隸往迎則餽送稠疊且偵其曹若何而已加厚焉以相傾冀獨為己地及一當乃公召請之使沓至青黃之額縣楹招搖市上關通門內受賕壞法不可殫紀數年來俗益敗法益弛一二黠者公然肆志各致貴數千金以上揚揚中衢人望見辟易不可謂非結長吏鑽貴官之效而君當崔令君之請次且不前欲榮以榜額卒固卻之斯其操行何如乎昨秋峒過余曰吾父以明年庚寅元日稱七十願得

先生言爲壽夫君操守如是是李醜之刃無從來中人之書無可誣罔者也仁心爲質而湯液佐之內取之已足矣大年宜待祝哉古醫之夭者無如淳于氏年三十九耳雖自知精審其陰陽人道必有所致患者君今已倍之益引而長神仙可學論豈有誣焉峒本名自炳垂髫時意氣豪上固欲以科名文學世其族業者也乃乙酉以後變名劉志無復當世意獨放情觴詠將處于材不材之間客游授徒取束脯以供菽水以爲是趙孟不與易此深得于君之庭教者君爲有子又豈緹縈一女所可望哉君真可以壽也矣

胡孺人五十序

歲庚寅春二月十有二日濬源李氏有舉五十觴胡孺人者吾亡友孝廉源嘗之元配今諸生時峙母也源嘗生萬曆己亥以崇禎庚午魁賢書壬午冬方治裝北上一夕暴卒得年

妙三

三

四十有四以彼人才而年位不逮余恨甚故余壽孺人語刺刺不能舍源嘗始源嘗爲諸生時義聲著耳既舉于鄉其主司新建姜公京山鄭公同門之友則楊伯祥廷麟陳臥子于龍楊廷樞維斗輩皆有重名負雋才源嘗與之氣激道合乃益鼓舞淬厲內淵廣而外卓犖志氣岸然徧交名碩銳意天下之事益多讀異書經史而外稗官雜家輒口舉其辭千餘言不脫誤而意向慕擬爲師資者如山陰之劉漳浦之黃中心誠服願及門稱弟子而未克故近求之同郡則建德太宰鄭公近求之同儕則金沙儀部仲馭又近求之同里同學則吳子次尾及余不佞皆投好篤摯以明親其所類而樂其所願嗟乎使斯人登王塗爲世用必有可觀而三上春官不第又不及中壽化去何哉余嘗因耳目親記太息而爲說曰甚矣登賢書之不如爲諸生也始諸生時畫作而夜思者尚

有孔孟詩書之語已而手口所及皆竿牘請乞之文矣始諸生時握手與游者猶子衿文墨之友已而稱入幕號劉頸者皆以狎耶進盡郡邑之胥隸指使之游閒矣始諸生時排比之言尚粗記誦辨具已而干謁媮其本業貨利荒其始圖不植而落一饑腹矣凡此三不如可恥孰甚時次尾絕倒余言獨源嘗之學問文章志意則鄉舉後日拓以大而日進以高究其所至可為世之偉人而卒然以亡未見其止則邦之殄瘁吾知其兆矣寧獨為源嘗惜與雖然使源嘗而在獲及見今日延年不過一紀然以彼學問志意卜之則其存亡得喪未知與次尾伯祥臥子輩孰先孰後其逃遯放廢未知與余孰遠孰近而謂其獨偕胡配宴然舉五十之觴吾未敢信也從時峙立義則母氏稱壽即為至樂從源嘗言今日之觴吾能無感歎乎哉且壺言不出外吾故不以誣諛相夸而第重念源嘗者如此始胡孺人有三子與吾子鑾皆者天時從吾游久文行魁岸有父風時亦英穎不凡是可以紹述源嘗即可以壽阿母矣

妙三十一

三

澤桐文集卷第三

嶧桐文集卷第四

二妙集三十一

貴池劉城伯宗著

議

駁韓愈學生代齋耶議

道之大用曰禮禮之大本曰敬敬之大端曰嚴祭祀蓋以其  
 恍惚與神明交精微之至聖帝明王所謹重也是故內心齊  
 矣尊疊刀纂咸勿之苟曾孫穆穆矣絲衣載弁者亦固敢吳  
 敖也使學生而非湛道德明禮誼以宣流教化之人則已學  
 生而治聖人之道沐浴禮教也則豈以執邊豆駿奔走為鄙  
 事乎哉使齋耶而非執邊豆駿奔走以與乎宗廟社稷之事  
 則已齋耶而有役于宗廟社稷雖小事夫非禮義之節目敬  
 其之著見者哉今學生者誇嚴自高曰吾德藝是為也彼微  
 末爾猥褻爾吾何問焉則齋耶曰我微末猥褻之徒也矣遠

妙三十一

劉宗

一

之不在德藝之內矣胡自苦矜慎為由是其周旋必不合度  
 其進退必不得宜其思慮必不固其容貌必不莊也滋甚所  
 謂牲酒瘠酸取其臨時薦裸興俯不中儀式寅清誠慤蔑之  
 一有則孝饗之具亡合漠之道謬人神之交絕豫順之休微  
 矣豈非甚不可者哉且其議曰令學生恆掌其事而隳廢其  
 本業則學生之教加少學生之道益貶是惑于理也甚矣古  
 之學者時教必有正業退息必有居學學操縵所以安絃學  
 博依所以安詩學雜服所以安禮吾未見入廟門之內游埤  
 墮之間究其繁曲習其羸重而幽明之悟不生仁人孝子之  
 誼不益慄動者也蓋學生之業之所以重于天下亦惟是敦  
 仁孝篤尊親明有禮樂幽有鬼神蟠際天地蘊隆休和已爾  
 而齋耶之事在其中矣躬親治之不以猥鄙推去之是向徒  
 見其理今明其數也向虛言其道今操其器也向概觀指略



今詳其品目科條也是學生之教加勤學生之道益隆而有  
用也奚爲不可哉不寧惟是今士大夫坐嘯堂皇媮安樂逸  
無復強力敏幹者皆學生而不爲齋郎之漸積也是故簿書  
符檄委壓繁多一聽胥史之爲而奸人有以措其手足則鼠  
齧蟲蝕蠱亂乃生彼胥史者又自謂吾之所爲煩劇雜沓固  
養尊處優者所不習也益窟穴其中肆爲奸利而民生國計  
日極敝不忍復云皆學生而不爲齋郎之漸積也是不可之  
大者也愚故曰學生可代齋郎齋郎可使學生爲之無以愈  
議從事則得矣

池州防守議上

今夫所防守者土地也而防之守之者人也人和聖賢正論  
也池無險而難堅有瑕而易動是故固人心尤急也曷言之  
池壤平遠三面受輪蹠東南盡青陽石埭境錯宜歛西盡東

妙三十一

二

流接九江騎而馳徜徉而入我國都矣徒行坦步連袂扣郭  
門矣古云奧府四塞一夫當關池何有也獨直北濱江湯湯  
天塹差足自限而十五里而近即爲皖桐兩岸夾治春水雖  
生可辨牛馬野航亂流而濟日夕相織使載奸宄千億輩自  
北而南誰曰公無渡也一城斗大浮置江干真黑子耳脫更  
有劇盜乘舳艫飄至則帆檣傳維堞立糜碎矣此所謂無險  
而難堅也而又隍濠不治庠薄者崩陁軍實不蒐單弱者烏  
有沿江戍所甃石皆散亡無論踐更者城自東迤北譙角無  
聲按部使者至行臺頗近即聊一鐘鞮過則已焉故四五年  
囚再反獄逸大盜劫公廨旁斬關出入無門焉者形見勢屈  
亦斷可知也其甚者芻牧日乖窮蹙已極教化亡具偷薄競  
起山居而谷汲者坐不得食則習惟埋剽劊之奸爲胥史所  
虐憤無復之者亦遂欲爲南塘之出此其地其人即青陽石

隸爲劇固與宣歙錯接習其風尚句連窟穴爲吾內蠹者也  
瑕而易動莫斯爲甚夫以有瑕易動之時而處無險難堅之  
勢何恃而不恐萬有一幸曰賊不至耳賊不至耳夫事久則  
智生兵挂而變起無論吾所云亂流而濟帆檣傳喋也賊從  
中出且奈何哉然則無策乎曰吾無險則不得所恃之資而  
務亟爲自勝之具吾有瑕則反觀利弊而得措置以爲轉敗  
之功非人心烏所藉之池雖褊小遠不暇論萬曆而後載籍  
可考者大略戶一萬九千七百有奇口七萬八千六百有奇  
即以附郡一邑計之戶六千七百有奇口三萬二千八百有  
奇也姑以一邑戶約略之戶得三人爲守守者二萬有奇矣  
戶得五人爲守守者五萬有奇矣夫今日之賊固非南倭北  
殊形詭性異技絕倫中國所死不敢鬪者也猶是飢民猶  
是逃卒猶是脅驅烏合之徒彼能爲跳蕩我亦能禽戮者也

妙三十一

三

且夫今日之防賊又非出玉門浮瀚海赴徵調遠期會急公  
家之難博趨義之聲也賊每焚村落或舍官城概殺平民略  
無存恤吾底力而防守防守吾身命也云爾吾鉤聯繩貫合  
力防守各防守身命也云爾無險可扼而不自爲堅距計豈  
其取族爲釜魚乎無險可安而遂無可如何聽之冀賊至則  
鳥獸散豈其室廬墳墓親戚骨肉不一望胸乎且羣盜如毛  
走則何遽不相逢也由是言之人自爲守者宜其踴躍奮迅  
觸白刃冒流矢計不旋踵也而有不然者德教不先法令不  
豫飢寒苦而怨怒積良民無聊奸人有以生其心也故務和  
人者使之衣食饒足衣食饒足則有生之樂而愛其死使之  
情氣和平情氣和平則無憤恨之志而不輕去其鄉使之明  
禮義重廉恥禮義廉恥明則偷生苟免之計詘而勇敢果毅  
之氣生夫池土固瘠土瘠則貧貧則易見德池俗固愿俗愿

則近厚近厚則易向方使池一邑中六千七百有奇戶三萬二千八百有奇口其所以謀為防者皆詳以確而力為守者皆勇以強何畏乎飄忽之賊又何藉乎恒怯無賴之兵哉昔者周澤敦龐人心蟠固故雖以洛邑之地夷曠四衝廢為至弱而可以久秦刻深強服人無固志則以咸陽天府形勝獨制而瓦解土崩策池者以小從大以古稽今亦若是已矣豈其老生常談哉不根本是圖而媿媿枝節兵饌水陸之謀囚鎖毫毛攻穴隙則寃說也夫

池州防守議中

夫守池者人矣則黎民其首治與曰吾亟治之人三而民不與焉三者之人治則民固已大治然後可得而用也一曰郡邑長吏一曰鄉之薦紳一曰庶人在官者蓋池人薄植而寡蓄志樸而氣辱非若吳楚他郡有末利之贏足多腴削負強

如三十一

四

悍之姿不受虐使也上之人稍煦煦之陰陽之即賈母召父之戴翕然矣今蠱亂塞路表去思而祝畏壘何纍纍也其或奮其吏氣虐以非辜誅求草菅罔遺餘力亦頭搶地謹乞憐而已默然飲泣惟所為而已卒不敢對一語雖然痛甚者沁心恨隱者刺骨幸今無事爾一旦賊至立而視掉臂而去無乃亦其情與責以手足之捍頭目得乎哉夫居上有行仁之勢為長挾布利之權其徭役均與聽斷審與催科時與贖鍰輕與贏羨省與不以民髓媚要人不以公法饋過客不以中飽厚吏胥與勤乃職敦乃事畫乃法與是郡邑長吏之人治也夫然固所以大治民也池之產顯要不多先達諸大夫類潔清簡飭恭謹自將爾非有宜興溧陽桐城之氣勢積虐閭閻也近稍一二汰矣有暴起得志遂為猗卓者或與上之人因緣交結得進說左右者則遣蒼頭訶里黨籠致富民輒

恫喝之又反抑疾苦開導利端貢媚乃公圖便己欲若是者  
 未有非贖財賄壞理法痛楚人心者也怨汝詈汝實啟瑕釁  
 可奈何且夫利則相先害則相後征徭或詭力役非平使赤  
 手枵腹伺隙思起之仇讐而為荷戈擊柝衛吾封椿郿隍也  
 有是理哉夫鄉先生死而可祀于社猶以是非義理言也今  
 患禍亟矣誠明而熟于計訟獄無涉與選舉無奸與素封無  
 覬覦與家奴狎客無橫生事端與民有利為請于上興之民  
 有害為請于上罷之與輸納則身先守禦則身奮效忠執義  
 作為倡率與是鄉薦紳之人治也夫然又所以大治民也雖  
 然未若庶人在官者實甚池有天幸吏吾土者未有非賢人  
 君子者也若不便而媒孽之感易之曰廉吏而不可為某事某  
 所用將安出某所某事費且莫支曰貪吏而可為某孔某利  
 應屬之公某利某孔取之無禁既以移上心中所欲而乃張

## 妙三十一

## 五

牙露吻偏吸脂膏矣其在地方鄉薦紳起而能言之若不得  
 獨為政也池則吾所云顯要不多產爾潔清恭謹搖手勿向  
 邇孰出一語是正之他一二汰者或反執恭敬仰鼻息交高  
 其能于君大夫冀因君大夫之暱若若為我地道以小有滯  
 沫也嗟乎下視他輩又何足云吾嘗約略計之郡大夫之長  
 其以書史役者殆百人以徒隸役以便嬖役者殆六七十人  
 他雜役無氣勢者不與焉邑之長人減其十之二郡丞別駕  
 及李人減其十之五他小官無氣勢者不與焉是池一歲而  
 有不去之蝨賊千也是千賊者其以作奸犯科枉嚇民財靡  
 有算數者置勿論第以常法度之彼皆輸值于前人乃入役  
 值豐殺有等姑約略之人率白金二百是已先置母二十萬  
 也即以二分息與之彼亦將歲取子金四萬于我百姓也蓋  
 池之民歲輸四萬金于千賊幾何年矣怨深而髓竭亦已甚

矣一旦又有所謂秦隴楚豫之賊至而此千賊者方徜徉堂  
皇追呼鞭朴曰爾民其衛我我役官家不編行伍爾民持金  
錢予我我免爾衛爾不持金錢予我我困爾以法雖勤衛我  
使爾受罰責然則池民者將捐忿釋怒肝腦塗地以死鬪去  
來颯忽之賊而謹衛負隅根蒂之賊乎哉斯亦大惑之甚者  
也請汰其黨與省其冗與平其值以補士伍與簡不法者沒  
其賞以享士與有過勿赦有闕勿補使漸耗折與不授以意  
曷翁張與不假以柄曷櫻攘與不偏為右曷恣狂與夫退而  
緣南畝者多則風俗淳而志慮壹攫財積恨者少則物力足  
而情誼專故夫大治庶人在官者又全乎其治民也蓋以防  
守切言之吏茲土者城池存亡之律危乎切膚矣薦紳之家  
其顧惜係累百倍于單弱窮窶也池之胥史又皆鮮衣美食  
廣田宅儲珍玩前堂羅賓朋後房列妓女苟不得倉卒從賊

妙三十一

六

則守之亟亦百倍單弱窮窶也是三人者庸可緩諸且以事  
理推言之本末相使道法相維其大較也賢君侯一人耳所  
與其扞禦者茲林林矣推心置腹乳哺安全潔源正表徒自  
為與亦將以生其共也夫虛室生白德威惟畏吾未見賢君  
侯之政教號令徵發期會不如翰如飛也夫鄉之大夫亦所  
部民爾民儕類之有氣力者爾庶人在官庶人也民儕類之  
害馬云爾今也民之有氣力者與其單弱窮窶者心意和同  
歡欣無閒晷則相見夜則聞聲翕然一人出而圖事斯大善  
矣害馬斥去之不游庠序即南畝矣尚耕作習勤勞則其力  
可使羞貪狡樂端慤則其心可安是去蠱賊干而益勝兵千  
再戰勝也益勝兵千而使向之憤恨幾幸叛亡者率頭躍專  
固荷鋤耒撻賊是更益勝兵不知幾千萬也益大善矣聖賢  
之業恃乎人心經遠之規始自貴近是故治防守者治人治

人者治其人之要聽者不以吾說為迂吾乃敢進而畢其議

池州防守議下

今議者亦大集矣吾皆用其說稍損益之而第行于吾所建  
議之後上下公私一心如結疏通牢固根本沃深則其事乃  
精而行乃效故有二經焉曰防江曰守城有四緯焉曰治兵  
曰治餉曰治民以出餉曰治民以益兵經之中條析之目各  
四緯之中條析之目兵有六餉有三而治民之目無專指總  
二說耳矣請具言之夫賊所在有之不必江以北也江以北  
者固然矣防江誠是也所謂禦之藩籬之外也江干舊有斥  
堠約十里一臺堞矣置守望矣吾視傾圮者繕葺之亡匿者  
句稽之一尉幕往按視足矣江濱舊有哨艦約三十里三餘  
艘矣三十人衣短後矣吾視罅漏者補塞之游閒者約束之  
一百夫長往董課足矣此二目者按舉舊典非擾民間然故

妙三十一

七

事治之亦未即有利者也若北來之艘必譏夜泊之帆宜問  
似矣伺察非常懼吳子輩白衣搖櫓也而池土寡產稻梁百  
物待命客舟窮詰苛嚴商賈裹足則池乃坐困又若澤居之  
民可益游徼近水之村就任團練似矣人自為守如范龍圖  
弓箭社可也而使等隸尺籍務欲中程器甲費貲迎送失業  
舊所征徭百未省一則民益重因此二目者事創今茲人生  
惶惑行之不善未免有害者也第言防江法如是止矣精修  
之使果得效則有由然爾且吾治所及池屬地也使賊上從  
九江濟下從姑孰湖陰來池烏能為故必有賊即渡江吾孤  
城屹立處萬全無事之勢而後可議防江也賊所在有之不  
必城以外也城以外者劇矣守城誠是也上所自為者嚴保  
甲謹讀法斯走集之奸絕窟穴之蠹清矣然或土著之子鷹  
眼性生或兵起之後鳴音乍作可奈何廣漢翁歸有鉤距籍

記之能雖效者莫及以詳以勤當亦具得要領也上所使下之人爲之者儲薪米斂牲畜斯圍城有支久之粟堅壁無齎寇之糧矣然數家厚積羣小生心無賴藉以尋端公家因之啟釁庸無慮諸常平公廩比屋贏餘使官私具足富貴不相耀以和其心蓋漸積使然也是二目者行之兼道與術矣堙城門有兩便焉輒登石纍力鉅而艱蒼黃不可爲也往來無他塗辨詰差易奸不得闖入也然而薪水迂勞貿易乖忤貧人廢業坐敝爲憂又物情沮抑病起鬱蒸啟閉有節可勿講與守城堞有兩難焉睥睨多于戶口闕一夫則瑕患人不足也坐派聽之伍伯受小賂則免患法不均也況乎責辦矢石督治衝墉勞力傷財猶或扶其臂又賊耗不時至便驅迫上城烽火屢戲朝氣銷亡力食者不暇給可勿思與是二目者行之辨久與暫矣第言城守法如是止也我觀今日之賊城

妙三十一

八

三日守即舍去矣顧誰支三日哉秦隴楚豫舒六之閒陷名城者以十數彼豈不講畫守具如所云云乎故曰精修之使果得效則必有由然爾此所謂江防城守之說也池兵六百爾落落星稀殆不能軍矣然使一可當百奚多少足云請語治兵者是有四先曰先之以廉卒故窶人子非生有敵愾之心也釋耒耜而韎韐冀得餉資給俯仰爾今常例有餽矣支領有扣矣替代有入矣贖罰有規矣卒知其指所在擗以啖之逸而事他作器與手終年不習即威與法不得施矣惟無所於染指則率以蹈水火可也曰先之以勇愛身命者人之情作之亦必有道矣池所署伍長非有大帥建節不可等夷之勢也乃者使捕鼠盜匿不敢前處己如幃婦人而驅素所進金錢法不得施之卒往以死鬪知必不能螫孤陷陣古專閫或爲之而況若等與曰先之以勤今日者非有臨陣決戰

經時不解甲介冑生蟣蝨之勞也稍練習之以待耳弓弛而不御馬食粟苦肥相號廢中不試而徒以責帳下兒坐作擊刺不少休息即故事耳何第苦吾屬爲也古者甘苦同士卒且經習勞瘁異日蒙犯霜雪橫草稱功不亦可乎曰先之以法蓋既潔清自愛身先勞苦斯亦可以有辭于下矣司馬法在如之何解縱繩墨也昨者城守戒嚴卒監門矣令勿聽人移家出而惟賄是問也賄不至則懿筐不得就柔桑賄至則肩輿纍纍且爲耳目導去也昨者江上耗惡卒巡徼矣令遏止北來者而惟賄是求也賄入則叩涉親于我友賄不入則賈客布帆執言爲寇虐之使無聊賴也是尚有法與而號爲其長者熟視之若無觀或反右之陰利其爲是可用之征伐行陣閒乎而治治兵者其最先有二曰先擇譽望之人池任兵事者世職白衣咸戲下矣非不云取資勳舊拔異屠沽也

妙二十一

九

而皆材質朽穢齷齪狠汗第持要人竿牘至或暮夜有所乞憐即一旦指搗在上矣人微望輕物情不服導之壞法侮紀爾即推擇巖穴乎曲逆窮巷門來長者之車淮陰寄食葬營萬家之勢皆早有著見非鹿鹿也曰先定畫一之官池兵六百耳水陸分隸殆十餘長轄之十羊九牧弊誰不知則以所持竿牘與蒼夜請無以塞責聊概存之分沾濡也卒多所剝而軍法如絲棼矣苟推擇之得其人即全旅付之金鼓號令事無兩制耳目專而心志壹不大善與省費祛貪又其次矣以是策池兵池兵其殆可治也且遂言餉貴池池首邑也方今丁一萬二千七百有奇有例免者實應差丁一萬九百有奇耳田二十萬四千有奇有例免者實應差田一十八萬七千有奇耳千方百孔取足其閒無事不徵無徵不派無徵派不重羨嚴科不獨三韓治兵薊門增壘稍出常賦外也故池



之餉萬不得更議增無已治其蠹餉者斯餉足矣曰取之蠹食土之毛既厚自予而以供軍國需其孰忍通之惟民政部之會計燂下邑胥胥謀之官匿不使外人見偽增教令別立科條正供無多而旁取已侈侈則不能疾輸輸不中程曰此逋上供也又加罰焉追呼有賄贖緩有入旁費益增而常賦益坐歉矣及是則輸將早及格矣曰入之蠹賦之入也所待命者多矣池之民之入賦也奉上法而畏罰不及格者罕矣乃納之筦庫如投大壑胥謂己物耳以置母錢以買田宅為富人居又狎耶用之若泥沙然羣役卒叩之那移稍應更叩之蔑以應巧謝之巧謝之不支事大露姑以身入獄為質耶秦然矣僉曰餉廩不贍夫豈不贍也反是則支給裕如矣曰出之蠹筦庫之士豈惟不出出亦實甚役卒來請必以賄俱賄不先即以今歲支昨歲勿有也昨歲之前益勿有也

## 抄三十一

## 十

賄先且計月日數如子錢與之即以今歲支明歲有也支明歲之後益有也勿有者詫謂餉不我足其有者稍踰時算之數歲之勤獲乃止此益大恨謂餉不我足而豈其不足也反是則士飽橐中矣以是策池餉池餉非真不可治也若眈眈者欲民再益餉吾既謂必不得增矣又欲益兵民豈得復為兵哉請無忌諱言之夫銖銖而積之至石必差言自有贏餘也今也不然正供未輸先懸羨格猾胥里正鬻十之三公十七爾夫民不望弛以與我矣官胥勿入以當加賦亦可飽數百卒也不然即文以美名曰人樂捐助而益勒苛急弊甚橫征度量不生奸人措手宜急罷之矣抑池有民兵殆將百人號稱壯快故籍戎伍也隸事公家久而不歸祇行旬攝每奉符一出雞犬為空吾所謂蠹賊千者其一也彼六百入者嗷嗷不平之鳴久矣還其本事隸而習之物情既厭亦以壯軍

容也不然刺取農氓曰練鄉勇而抽及矜寡廢棄耕桑石濠新安之詠再賡宜亟止之矣且自昨歲迄今別有募置盡惡少年親若牙兵氣同驕子飛而食人道路以目矣不戢自焚端在若輩益招致之解散何時也凡吾所議兵餉者皆不治兵餉而己議治民者皆略略于治民所以大治兵餉也豈惟不治民兵之矣固人心植根本所藉慈惠之長明察之師非伊朝夕矣前所云云有行之而效有行之而玉卮無當象人土鼓而已吾是以務推原其所由而不遽言之不遽言之者固將精治其事豈闕說乎哉

制鎮將議

臣嘗謂御將者當假便宜于行陳之間不可不嚴轡策于坐鎮之日此通論也然于邊帥尤甚蓋內地氣勢頗在文臣民多于卒力無所逞彼操殺人之器挾可以為亂之資而常抑于不得用故諸弁之就繩墨也易若邊鎮之將度其事勢殆不可不制者而今日尤甚其說蓋有三端一曰天遠夫輦轂之下禁令嚴密內地之吏文法拘牽故賢者雖無以盡其才而不肖者亦莫得甚其惡今邊關之帥遠接中朝建牙秉鉞一鎮之上蓋惟知有總帥已也撫臣地位僅頤頰矣制臣鞭長不及腹矣豈惟莫約束之家丁健兒文吏自顧不如遠甚且甘退聽矣閭閻萬里明有所不及照法有所不及施驕蹇自恣或遂亡等故昔日東李西麻之橫與近者祖氏一門之肆沿習成風日漸以重此不可不制者一一曰地險國家建都三面鄰虜凡此邊帥接跡穹廬之帳出門數武即虜巢矣中朝所謂戎狄豺狼者邊帥視之猶閭里故舊也馬蹏絡繹聲息時通厚利甘言往來不絕不重嚴其防彼益與之媾無

妙三十一

十一

忌矣不陰制其命彼且外挾之以要上矣稍一動搖關隘險阻殆非我有故石亨圖不軌必謀以石彪鎮大同啻氏既舉事遂顯以寧夏向小虜此不可不制者二然謂今日尤甚何也曰與中外交關夫邊帥之不易制也如此矣所幸者身在疆場內無與援事有影響則法網隨之未見必不可拔之勢也今皇上無鎮不內臣矣當內臣之始至邊也目不覩戰陳之事耳未聞金鼓之聲勢不能不以情實託邊帥而邊帥則挾其所難而有以恐之其操之爲已促矣及內臣之既在邊也體非全氣性樂調諛之文人實有徒意在饗養爲快彼邊帥者恣睢于萬取而奴隸于一二人則投其所喜以媚之其結之爲已深矣且內臣武臣并積怨怒者文吏也以左右班相軋之人構之于南北司水火之日朝夕一鎮之內包圍文吏而作贊焉其中之又已至矣若是則鎮將之柄日重鎮將

## 妙三十一

三

之美日聞撫按不得行糾彈中樞何所施甄別蓋自鎮臣謂邊帥不我欺而皇上謂監臣不我欺斯邊帥之不可制已甚則不可不制亦岌岌乎哉臣所尤慮今日者此也夫今日邊關大帥其階秩則三公三少也其物力則荷頓陶朱也其蒼頭義兒皆拖曳金紫布列偏裨而足以貧人富人人生人殺人者也又所與善矢到頸結歡投好者中車令大長秋外廷大臣所隔絕不得通而彼歡洽無間者是身在藩垣而機在肘腋之中跡遠荒徼而事探紫闈也此其勢易驕驕恣則僭擬僭擬則眾益附而長亂萌始不制而使之驕既驕而驟折之則恥恥則怨怨則釁隙多而事以起嗟乎臣能無迂慮與然聞近議者欲裁郡邑之佐盡易以千夫長百夫長參錯腹內事勢平分將纓綬漸誦于兜鍪市邑幾同夫戍堡臣所謂內地氣勢頗在文臣民多于卒力無所逞者其說大謬不然

矣使此議果行奈何獨認認憂邊帥哉

池州防守後議

崇禎乙亥春愚嘗有池州防守議三篇時不見省屬有天幸卒恃水為功也距今十年事勢大異無論長江之險賊與我共今豐芑之氣更新雒邑之營若待池于神京且為三輔視北之真保通津不啻焉謀國者不以甌脫視池則不獨池幸甚作池州防守後議略一而目亦有三

議者謂九江有督安慶有撫錯南北而扼上游池門戶固矣池何庸為而未盡也池屬若建德東流過安慶而上百里直接江省之浮梁彭澤者雖皖輶可及夫固先皖而承上流矣是池不全恃皖為蔽也池之貴池青陽石埭又與徽歙影祁南陵旌德涇縣牙錯大盜所窟探丸無虛日非有重臣以坐鎮之不可萬曆間皖盜作逆建議者以徽寧池太安慶廣德

妙三十一

三

總蒞一道臣而治于池其蒞以道臣也時天下全盛盜無大根株以監司鞭筆之有餘力也其合徽寧太安廣德而治于池也蓋池北帶江濤南鉤連山管肩臂大郡巖邑惟治于池而聲教可四達也今荆襄糜爛楚豫纒髮絲是故江無督而有督皖無撫而有撫而池獨一道臣焉可乎且以昔之道屬割安與廬焉又割徽與寧為一焉僅以池太仍其故銜事既劇于前而地小力薄于異日又權分界畫莫相統承為池道者不益難乎且今帝在南都輦轂伊邇下則徐淮而揚而滁浦門之重籬之複可也上則武昌九江而皖而池亦門之重籬之複可也京口蕪湖斯堂奧矣焉及乎故為今日神京與池人夫道固有署矣堂階弘敞胥徒備具督餉尚書嘗駐治焉無營造之費省廩食之增此至便也惟在得人則愚謂即道

臣程公世昌其選矣去歲之春左帥勤王爰及洵池莫必且夕公時蒞任一月耳內固吾圍外聲大義勤劬談笑使騎兵之至蕪陰者可返而流言之及白門者無微池人恃以為命是故西江之調民走兩臺爭而還我蓋公自平陽禽叛有餘勇焉至池民之感則在肌髓夫天下爭以人心為本眾志成城屹如金湯況所區畫如積粟繕器增城練勇業有成緒亦未可中道捐也駕輕就熟而從池人之所願池先有固志矣于是議巡撫之兵夫池須重兵應撫鄭公已請增三千而池民皇皇求罷者鄭議調之浙又議募之他方也客兵為害池人恐焉今池既開府兵自宜增然愚有策者池舊有池陽營兵六百矣有忠勇營兵五百矣皆駐城內有荻港營兵六百矣池以水師分防池太閒隸道標下固一千六百有奇矣簡練而精治之無虛額有拳勇則一千六百之餉

妙三一

古

可勿增也然後募之池不足募之徽寧太廣閒皆撫所屬地取土人親識結狀隸籍伍焉則上游之奸細無闖入而土著鄰己之近氓亦不至悍獷不可制池有三千之兵增於舊者實止一千四百池之撫兵大集而事省矣于是議撫兵之餉夫池人堅不肯增兵者既以苦兵亦先慮餉也即如池陽荻港兩營兵固萬脣閒合徽寧太安廣德而隸一道者所以千餘人之餉皆派之七郡閒當時一道臣治之統轄專而氣勢行餉以時至今三析焉矣皖餉首不至徽寧廣德視如秦越十呼而不一應兩營之兵每缺食至數月事蓋爰爰也若忠勇營則池鄉兵爾由池田畝餉之按月入手無踰時故夫各郡協濟之名不如一路專給之實得失亦大可見矣愚以除池陽荻港兩營一千餘兵之餉照舊徵之徽寧諸郡蓋諸郡既統吾池撫則符檄所行郡邑奔命此無庸更制爾至所增

千人餉則斷與忠勇營同徵自池取池所解京之銀盡截留  
 以餉此兵不待命于協濟然後士宿飽而事無他虞且池一  
 耳若練遼之餉既蠲京運之耗亦減更截留數項以濟吾池  
 愚且謂三千人之餉并可取自徽盛諸郡而況此一千五  
 百人乎餉不望濟于西江兵自弭耳而聽命雖蹈湯火可也  
 至餉足而池撫之事乃大濟池撫之設無再疑矣夫池得人  
 而撫之兵餉以集北與皖犄角而南引徽宛姑孰以拱神京  
 此豈徒池幸新朝之股肱高皇帝之弓劍實憑依之

妙三一

五

嶧桐文集卷第五

二妙集三十二

貴池劉城伯宗著

論

隱公論

三傳曰隱攝也桓貴而幼隱長而賤姑立焉將有所與也歐陽子曰非也生則稱公死則書薨國人戴之一魯君爾何所明其攝也余曰二者之說皆未盡也攝之說自古有之而隱不必然即隱之攝亦隱欲然自處之情有之而義不必爾也周公于孺子有居攝之號君薨而世子生有卿大夫從攝主之文然皆有所不得已者隱為繼室聲子之子則適子矣仲子雖貴不稱繼室亦妾子爾即諸侯不再娶隱與桓皆羣妾子而隱又長矣君魯者舍隱其誰飭妖妄之手文借貴援子外氏于理道何居而反指長君為代匱乎故曰攝之義自古

妙三十二

歷代

一

有之隱不必然者也然說有自起事有從來惠之嬖仲欲以立桓審矣手文貴族之論既播之于家庭朝亡之間屢見其意隱賢者也欲承先公之志致之桓以明高審矣是故攝之意常以自予亦以語人則當立之義及不見而攝之形以成昔宋穆公曰先君之不爾逐可知矣吾立乎此攝也夫穆公非攝也而自云以攝欲致國乎與夷也隱亦曰為少故也吾將授之矣使營菟裘吾將老焉此與穆公之辭同皆實非攝而自云攝所以為讓焉爾孰知國者利器不容假人可辭讓于未我立之先不可疑似于既成君之後人方欲就我或避之人方急操我或縱之授奸人以口實而藉之柄隱自處有未盡焉豈謂分實應攝乎哉故曰隱之攝亦隱欲然自處之情有之而義不必爾也迨其後君魯者桓後之有魯者皆桓子孫也借隱為讓之辭遂蒙隱以攝之實以解桓之惡已爾

承譎習舛殆非一日三傳之語必有所師非臆說也而第不深察其情其實隱有即真之理不當被攝之名是以隱自處乎攝而處隱者以爲君內外無不順之辭而春秋之書皆予以正乎君之法非好學深思不能心知其意故曰二者之說皆未盡也

荀息論上

陳乞欲篡齊故諾立荼之說而不沮荀息欲殺驪姬母子故順立奚齊之命而不辭立荼則內亂內亂而我承其隙齊可得而有也是陳乞之情也荀息豈欲殺驪姬母子者哉第順立奚齊之命而不辭則勢必至此而息不知何也春秋二百四十餘年間奪嫡立寵蓋亦有之然善其終者少矣又況淫嬖殘賊神人冤憤未有如驪姬之甚者也國人不順內外生心不待智者而見息謀士也能以璧馬易虞虢而璧馬如故

妙三十二

二

顧以奚卓易一身而并奚卓失之與使申生君晉或夷吾重耳有一立焉彼其之子以先君之遺簪敝履邀惠後人終其天年豈不母子俱全哉違眾推擁坐速其斃併命一朝使之俱盡非息殺之而誰殺與吾嘗思之荀息里克皆晉望也廢立之謀獨難里克宛轉優人之口幾幸一達爾其于荀息公直告之明以藐諸孤爲託蓋公與姬嚴重克而狎睨息此可見矣後之論者以忠貞許息何哉是不明于春秋之義者也

荀息論下

或曰春秋書里克弑其君卓及其大夫荀息與孔父仇牧同辭許荀息之死于卓子其與息者至矣劉子曰不然事有所相連而時有所相屬則及之及之者同所以及之者異據事直書而是非美惡人自見焉爾宋萬之弑其君捷也君已弑矣聞難而趨手劍以叱者宋國之大仇牧一人而已于是不



及仇牧是全乎美之辭也督則以豔妻之故殺孔父矣其君救之及乎弑焉此似以孔父及與夷者然君子謂國有其主比肩事人而擅殺一卿蓋既有無君之心然後動于惡故先弑君以及之此其及為探情而書固已異矣且夫君黷于戰民不堪命父為司馬無一匡正而與為虐焉督乘眾怨以行其私非無故也則及孔父者若曰孔父亦及此矣是美惡半之辭也夫荀息者主乎君奚齊卓子者也卓子者孰君之晉之臣民無正乎卓子之君者息獨君之已爾事起于息成敗與俱奚齊未已卓子繼之皆息驅無罪而就死地以實已經不正之言克雖不及息息庸自己諸及荀息者若曰息也果及此宜哉是全乎惡惡之辭也昔人謂美惡不嫌同辭非也據事直書而善惡自見焉爾不追原始之不正而第許後之不食其言所謂不知春秋之義者陷于篡弑之誅死罪之名皆以為善為之信矣

妙三十一

三

里克論

里克非中立也其曰中立權辭也里克無權辭而于中立一語有遜避焉人故莫之察也夫人不知其始究其末不知其終審其初焉爾里克之傳申生也公使伐山戎則諫明冢嗣之職斥帥師之非一曰太子再曰太子侃侃正論無回譎也至其誨太子又謂子懼不孝不懼弗得立修己而不責人則免于難蓋教人臣子義理宜然此所謂與人父言依于慈與人子言依于孝者也使必以擁立申生始為克解則獻之昏庸視漢高隋文唐玄代何如者而謂其臣皆效乎使必以智巧謀術導申生以自脫將大之潘崇陷商臣而次之石德以敗戾太子可乎哉克蓋學術端方行誼淳固不苟為機變如平鄭者流此吾審其初知非中立人也申生而既死矣奚齊

儼然君而首息爲疆相輔之矣克苟中立此固可以集于苑也乃其信奪嫡之討行嬖孽之誅上存典常而下爲恭世子自誣抑此心蓋未嘗一日忘者安君之老不驚其暮年而始發之今日克豈中立者哉討驪姬之罪止于惑蠱讒邪而拒平鄭秦狄之計吾故謂克學術端方行誼淳固不苟爲機變者究其末以泝其始愈知克非中立人也中立一語聊以塞優施之望而觀其變懈其防殺其怒以不吾忌吾然後可有爲于後日爾使當時疆諫力爭悻悻見面不過與杜原款同死死無救于申生而荀息異齊相與以有成也吾目瞑乎哉克于晉君臣父子無權辭于優施獨然者君臣父子當以正告而優不以人畜也蓋其始末初終曉然矣故曰里克非中立也若不鄭者陰陽避就真傾危之士哉是則所謂中立也云爾

趙盾論

妙三十二

四

盾之弑君信矣無可疑者歐陽子以經文縣斷之不如吾以傳事明覈之爲得也蓋盾之弑機成于君臣相疑之際而宥之操刃受盾指使爲之者故曰盾弑君也何也靈之立非盾志也盾志在公子雍此逆彼來有成謀矣迫于穆嬴不得已而改圖靈焉爾此大卻也靈之既壯得母曰是志不在我者與芒刺在背怏怏非少主臣此念未或忘也盾得母曰是且以我爲不立彼者與藏怒宿怨故諫不入而汰自恣我刀在頸矣寧我負人此念又未或忘也是故鉏麇之遣伏甲之攻甚至無策而焚是喉蓋靈禍心復志無遠圖大略不勝悻悻焉若高貴鄉公拔劍登車之所爲爾爲之盾者方且世執大權陰行小惠其謀深其備久觀翳桑之餓與爲公介則公之前後左右無非盾私人也或奔而告或謂公養女等正在今

日如提彌明輩此屬何限于是穿為之賈充成濟抽戈桃園而弑事成矣此謂穿自為之可乎哉曹髦之薨昭尚自投于地垂涕對人奸人面目誕詐如此謂僅一出亡者無與弑事乎陳泰語昭曰惟斬賈充以謝天下昭曰可復下此否泰曰但見其上未見其下泰見且如此而謂聖人縱舍首惡姑錄細餘哉經曰趙盾弑其君夷皋誠哉弑夷皋者非穿也盾也

伯州犁論

國事不立由功罪不明功罪不明則勞臣荷戰而歎人莫肯致力焉故也有掩人之功以為己功者則又有掩人之功以為功于人者楚伯州犁之媚公子圍是已奪寶封戍之鄭皇頡以予圍而已若不與則媚為太巧焉爾方圍戍之爭頡也犁但曰請問于囚使戍可自恃者然又曰所爭君子也何不知處戍以美名善地俾其坦心以聽者然乃上其手曰夫子

妙三十二

五

為王子圍寡君之介弟也下其手曰此子為寶封戍方城外之縣尹也誰獲子是其手勢口語輕重所在明白曉然頡故曰遇王子弱焉誣以取說冀免死為脫歸地豈顧問哉第使獲敵者皆如戍以誣罔罰不獲而獲者皆如圍以首功賞人情憤惋疆事懈弛國受其敝將何可言鄙夫之害無所不至此之謂也且風指示囚使相傾陷春秋不多見而犁創為之又況後世坐堂皇盛刑具鑿楚之下何求不得或乃微見風采投指所在利啖于前而刑威其後囚有不承上意自誣服以冀旦夕之命者哉是皆州犁之教階厲無窮也雖然圍既弑主亦即殺犁之巧媚無庸矣

吳季札論

季札可以讓者也抑不可不讓者也而獨孤及猶然非之不成人之美小人之見也季札非適長也即有治命義不為亂

首古之人叔齊行之矣故曰可以讓者也札之始讓也有兄諸樊焉兄餘祭焉兄夷昧焉而我偃然越而君之三人之讓人人誠然乎一有不然禍及其身及夷昧卒札固讓以逃也札見微知著人也僚有欲國之色札知之矣光有欲國之心札又知之矣身死之後國將誰致且恐不能待身後則己為大愚而國以不寧札豈貿貿若此故曰不可不讓者也夫春秋二百四十二年中以國之故子殺其父或父殺其子弟殺其兄或兄殺其弟獨孤及不此之罪而季子是嘗所謂比于逆亂設淫辭而助之攻也故曰小人之見也

晏嬰論

晏子蓋老氏之流其敬與儉非必盡精義之學也致虛處後所以遠害全身焉云爾蓋崔慶莊景之間幾于君臣相讎其沐已甚不故則瀆瀆則慢慢則樂易相招而其流必及莊以

妙三十二

六

見憚亦以得疏疏故事變之來我無所與也且力行節儉即寡所取寡所取即家無贏餘故曰吾邑不足欲也益之以邨殿乃足欲足欲亡無日矣涉亂世之末流有戒心焉是以安居湫隘而推祿以給舉火者畏陳鮑之樂高我也夫君斃于弑一國沸然徜徉門外而曰獨吾君也乎哉吾死也曰吾罪也乎哉吾亡也何脫然也四族並起又端委卻立而無所可否曰何善焉曰庸愈乎何混然也置身事外欲行地而又絕跡後之留侯曲逆而前之老子已爾去聖人之學其閒豈止尺寸哉

三桓論

田氏之有齊也舉全齊之強皆為田氏有故足以有齊也三卿之分晉也三分全晉猶各為強諸侯故足以分晉也魯為天下弱久矣世及之君席魯之全業其氣力不能當齊晉一

巖邑而欲以不義得之又數裂焉所據幾何其能國乎蓋季  
自意如斯肥而來世有失德戴僖之澤斬然豹媯州仇蔑速  
矍孟叔而欲以區區之魯爲三諸侯豈不爲天下笑哉隕命  
之速不能終日不必智者知之是故三桓者以之靈公晉主  
則有餘以之楚侯開國則不足勢使然也孔子曰故夫三桓  
之子孫微矣故者已然之辭豎牛陽虎之事已數見矣私家  
之難方作未止而欲以謀公乎微者寢衰寢弱消耗滅沒不  
知所終之辭是魯與三桓同究竟之象也

莊周論上

孔子曰無爲而治者其舜也與夫何爲哉恭己正南面而已  
矣孟子曰如智者若禹之行水也則無惡于智矣禹之行水  
行其所無事也夫舜禹之在當日甚有爲而勞甚勤苦而有

妙三十二

七

事者也觀天畫地一年而身至方岳者四律度衡量之瑣細  
皆屑屑焉屬二渠播九河疏鑿灑導弱水流沙之險遠罔不  
區處也而孔孟云云者誠以爲其所無爲故有爲而無爲事  
其所無事故事多而無事也聖人之治天下教誅生殺所以  
爲器也禮樂文章所以爲數也行乎其中者性命焉已爾性  
容與乎其自然而命安于所不得已性命之理順則天下大  
治矣此堯舜禹湯文武周公孔子所恃以治天下者皆然而  
不在乎區區之間也聖人務盡力于器數者蓋誠以之順性  
命也後世塗飾乎器數以撓滑其自然不得已之故則反以  
之亂天下也莊周曰後世之器數可以亂天下則器數不如  
其已聖人之器數所以順性命而流卒至於亂天下則聖人  
之性命亦不如其已是以曠乎游消搖相相然齊物化也堯  
讓天下于許由曰夫子立而天下治是孔孟之致中和而天

地位萬物育也許由曰子治天下天下既已治也是舜之恭已無爲禹之行所無事也夫曰恢恠慝怪道通爲一凡物無成與毀復通爲一而獨出曾史之行訾仁義之言使聖人不得與大盜俱錄伯夷不得與柳蹠同收烏在其通與一哉故曰寓言十九卮言日出斯亦可以憮然言外矣嵇康曰少讀老莊益增其放此不知莊者也郭象曰莊子可謂知本矣此深知莊者也孰能其出不訢其入不距脩然而往脩然而來乎則舜禹之有天下而不與者乎孰能化余之尻以爲輪以神爲馬因而乘之豈更駕哉則舜之恭已無爲而治禹之行所無事者哉

莊周論下

周之觀理也精其憂世也亟觀理精故窮極乎道義之原憂世亟故憤極乎汙流之俗窮極道義之原則知煦煦非仁子

妙三十二

八

子非義雙雙不可以爲禮而閒閒不可以爲智故欲盡鋤而去之以爲快憤激汙流之俗則見竊仁者一儼然仁而安忍不仁者雖至仁亦無如之何又不如盡鋤而去之之爲安是以辭者雖大義亦無如之何又不如盡鋤而去之之爲安是以辭指瑰譎洸濛自恣與聖人和平中正之誨遠矣至其甚嘗孔子多在外雜諸篇蓋後人所竄入文辭淺陋證據乖悟不再辨而見是不可以重周罪也周之言曰親父不爲其子媒親父譽之不若非其父者也是以周拮擊仁義而我知其志存仁義周詆訾曾史而我知其意尊曾史也

四皓論

四皓策士也而或擬爲神仙故或疑爲僞飾皆過也夫其山居而老得至耆壽者策也其不能已于一出以稍見其功名亦策也何也秦爲無道以烹滅諸侯焚燒先籍寇使其民如

湯火之燎體此其大亂可計日至己自度之非興王之身又不肯爲烹狗藏弓佐命之烈則奈何以其軀橫四通之衢而供劉項之鋒鏑是故逃去入閒山谷結此同心徜徉芝朮蓋自放爲臙腫支離之樗櫟故斧斤不尋而天年得老此不過自處之審而非有他吐納神怪之事故曰策也夫漢興十年矣商山不在絕徼四人之蹤已達于高帝留侯之耳而謂高帝留侯之生平與漢廷之政治得失不詳熟于四人之聞見哉故夫聞嫚罵之習抗手自高當卑躬折節之禮則翩然來報殆亦人情非盡飾說何者四人蘊奇抱略人也亦不肯槁項黃馘絕不一見知于世所以聊玩人閒欲偶爲一非常可喜之事以至泯滅而況太子之聘可以不來留侯之招不可不赴彼豈不知滄海力士圯上老人皆從良游而奚有吾四人哉要所以見其爲策士者在聞太子將兵之命而

妙三十二

九

急謀以止之夫太子將兵是晉獻申生之已事也然漢廷諸臣未聞有起而爭者獨四老人已汲汲相謂告建成以禍患甚詳而教建成語呂后以乘閒之言甚具使徒深山野老乍至闕廷其能與人幾事如此乎昔者侯嬴一抱關而知王之兵符在臥內惟如姬能竊又知公子之爲姬報仇而姬願爲死也事卒以濟深山老人而教皇后以泣止又教建成以閒語后何以異是吾是以決四公爲策士之雄而笑往者狐突之拙也至于偉衣冠以相耀稱太子仁孝慈敬延頸願死以相劫何一非儀秦范蔡之故智哉若夫太子既定翻然遠引不知所終世益擬爲神龍威鳳而不知策士蓋有之魯仲連爲人排難解紛而終無所取欲以輕世肆志是也夫仲連固戰國策士也嗟乎侯嬴田光皆藏身戰爭之時以至子老徒以貴而下士者諠當爲報遂一爲公子死一爲太子死而不

辭綺黃諸人亦老為漢太子出事成而乃得為魯連先生此其成敗利鈍不同而為策士一也何疑哉

陳平論

陳平事高帝猝智應變出奇無窮至呂后欲王諸呂遂獨居深憂計無所出何也平與絳侯比肩同朝已幾何年矣豈漠然無交者何至用陸賈言始以金為壽兩人歡相結也蓋平所憂者非憂己之不安劉氏而正憂絳侯之不與己同也其憂絳侯不與己同者非憂絳侯之不乃心王室正憂絳侯之不如己委蛇呂后也何也勃厚重少文人也意其端嚴誠懇正而不諱者事事見之已為呂后所憚矣使后欲王諸呂勃之爭孰豈後王陵哉是則平之阿曲承順無其助無其助則平所以制呂氏之術不得行而勃官太尉又主兵者也使徒仇質無術以與后激爭大之有死亡之禍而小以解脫其兵

妙三十二

十

柄將盡用呂氏黨以代之夫后之給彭越殺韓信如弄小兒何有一勃哉使主兵非劉氏之人則平益無其助而呂乃真不可制而此其說平又不可以開口告之勃者何也勃厚重少文人也彼方端嚴誠懇而以我阿曲承順之說進疑于自見短而取輕于勃辭或囁嚅隱約不盡其意則且速勃之疑而謂我實貳心于呂勃不諒我而所以制呂氏之術愈窮此皆平之深憂苦慮計無復之者也此其情狀已盡為傍立閒觀之陸賈所探見矣夫平勃未始有不和也其所慮不和者非功名相軋利祿相傾而意見有不洽血脉有不通滯礙隔闕此不和之大者也賈自見其情以啗平曰絳侯與我戲易吾言如此也是平所欲得于勃者可一一與賈策而所欲語于勃者賈可代為騎驛交通其間也不特此也賈與勃如是其



暱如其可以言也。意賈所爲平。晝呂氏事。安知不先爲勃。晝也。安知不先以平阿曲之術語勃也。又安知其來見平。不先以語勃而勃亦使相覘視也。賈但得平語爲證而已。躍然可還語勃。于是平不可自致于勃者。皆賈代之語而所欲勃如此者。賈皆導勃使如此也。昔者項羽以高帝入秦。距關怒欲攻之。假使帝身直謝鴻門。羽盛氣之下。帝必不得盡其意。有項伯以先爲之言如此。其還軍如此。其備盜傍人。緩頰羽氣。始乎帝明日之謝。不一語自辨而事已解。使平自以偃阿之說進。少文之人。略說驟聽。必有格格不入者。安得賈之恣言深論。出局外旁觀之口。而又往來交通。幾爲傳致。足以移勃之聽。而使之樂從也哉。夫平勃非始無交者也。至是平厚具樂飲五百金爲壽。而太尉報亦如之。蓋隱然申之盟約。而重以要結云爾。自是廟堂之上。兩人反可漠然不言。所謂深

妙三十二

十一

相結而將相和者。此也。異日者。后欲王諸呂。平勃皆曰。可王若出一口。夫平挾知任數。其固然耳。勃端嚴誠慤。漢廷倚以爲重。而與彼同聲不一立。異豈勃之素哉。則平之謀而陸賈教之也。然其不結王陵。何也。勃雖少文。而沈厚多思。故可徐悟。以事勢所必至。王陵直躄而已。必不可說而動。而又爲相而不生兵。相已有平太尉。又有勃事。固已辦矣。且留一陵爲正論。以撓之。使知漢廷尚有人。而吾魯祇曲意。呂所謂無用之用。亦平與賈之謀也。觀呂后怒陵。遂欲廢之。遷爲太傅。以奪相權。使勃且爲陵后。何難奪彼兵柄。不將使平孤立無與哉。吾故曰。平之憂者。憂勃之不同己術。而賈之結兩人歡者。蓋專結絳侯。以曲逆之術。俾同心委蛇。而特申盟約。以安劉也。嗟乎。後世宰相欲濟國家之事者。有其心而無其用。有其用而無其助。如賈其人。曷可少乎哉。

楚元王論

余讀馬班儒林傳歎其于師門授受之稱某守相某二千石某至丞相御史大夫三公九卿大官是誠以經術為利祿之媒鄙哉傳六藝而昧六藝之微言大義也又覽楚元王交傳竊以為交固漢儒林之首惜史不以列浮邱伯申公轅固閒而徒例置之藩王已也夫交固高祖同父弟也秦漢閒急攻戰燔墳籍一家之內仲則力由治生產矣季則好酒及色嫚罵儒生矣交何所見而早毅然學古獨與穆生白生申公輩游處略同受詩于浮邱伯豈非豪傑之士無待而興者哉即交生平身嘗從侍高帝帝即位後出入臥內傳言語與諸內事隱謀而動無過舉不見瑕疵王楚二十三年歷事呂后惠文際危時遭變故而行無詿誤令名考終非漸漬仁義之府沈湛典訓之林者能有是哉即其與穆生申公輩始終不渝

妙三十二

三

貴而下士學焉不倦猶以卒業長安燕翼鄧客總交行事其于邇事父而遠事君興觀羣怨之閒處之有道而應之精審矣是深于詩之教者也夫誦詩而授政不達至有明經大儒沒身邪黨則無以誦詩為考交之生平行事意其所次詩傳號曰元王詩者精義必有可觀何渠不如韓嬰外傳之牽合破碎而後世蔑傳焉豈以其位在大藩門無私授莫為之尚家弟子以相繼翼故卒不顯與惜哉然而數傳之後辟疆亦又好詩能文與子路叔皆清靜謹厚以行誼顯至向遂開源流詳經術精忠為漢一代宗臣冠蓋所由來遠矣元王之世遂以經義與西漢相終始焉今夫漢興歷高惠文景矣至武帝表章六經厥功始茂然帝神仙土木兵戎之事疵類百端甚至身以親父殺其愛子而海內騷然後之論者曰秦皇漢武幾以表章六經之盛下與焚燒詩書之惡同歸大惡而莫

別賢愚孰與夫含風吐雅終身寡過之賢王之爲應經義而精道術哉如之何不以首儒林也

貫高論

貫高身被楚毒不悔卒明趙王之不反王生而已乃伏死其誼甚烈余以爲高特俠士之雄要不明乎理道之分者也天下共主也高等之臣趙王猶趙王之臣漢帝也赦于天子分則君臣恩兼子壻春秋之義王人猶加于列辟而況親天子所至乎上有桀紂逢干不改其度況一語言禮數之急媢乎以一箕踞媢罵之不可忍而據欲扶胸屠腸于天下之共主斯亦悖理滅義之甚者矣即以其十餘人共爲不使王與曰事成歸王不成身自坐吾不知以區區之趙弑事顯白內有良平絳灌之儔外有齊楚荆燕淮南長沙之屬趙持此安之是事成之日固趙滅族之辰也若夫謀一發覺赦即檻車

妙三十二

三

雖以魯元之故不能解豈少而女之疑使帝終不聽高而遽以王坐亦奚辭又使高不幸而不勝劉蕤奄忽以死又誰與明王者是王之不族幾幾乎毫髮閒耳此皆高午等不辨理義冒昧冥行而重禍張氏者也然則高之絕吭就死豈惟仰愧天子不亦慚負趙王哉夫身爲之則身坐之堅持本根所以不以累王此自其本分事豈以立名義不侵然諾者事敗而脫己誣人行若狗彘乎斯不足爲高難矣故曰人臣而不知春秋之義者必陷首惡之誅高徒見戰國時各君其國各子其民之習又徒喜荆軻聶政慷慨捐軀之風遂以行之天王共主幾陷其國以大逆覆宗而不覺區區一死安足塞責此皆不學之過也雖然深學問析義理儒者或難之吾奈何以責負奇任俠較然不欺其志者哉

田叔論

田叔燒獄辭事乃無有遷史班書皆不載獨褚少孫自以摭拾所聞綴此一語而溫公以之入鑑學者遂甚稱焉余按以當日情事及馬班家言豈惟不可抑亦不必而斷知其無是事也夫漢法即疏叔即負奇能立事未有奉天子專命往按大獄獄具傅爰書矣持以還報近國門而焚之以是稱使臣塞執事者也原焚之意凡以爲梁獄解而已輕重出入辭不具在乎吾焚之而天子怒我遂事疑梁有大惡而吾與爲陰私益窮治之更遣廷臣往簿責之事何所底激主怨而開大釁已無所逃罪而累梁以重禍不可耶且叔之爲梁獄解凡以爲帝與太后閒而已夫帝之有不忍于太后叔知之矣太后坐而可以爲梁庇叔知之矣吾抱獄辭而進吾說如所稱無以梁事爲也云云是以無厚入有閒此庖丁之解也左持牘而右責聽而奚以燒爲且叔既久案梁意又主爲梁

妙三十二

古

解梁之陰私宜亦頗聞韓安國之走長公主叔意之矣鄒陽之于王長君叔料之矣一太后已使梁不斃而況梁必竭智力以要游說其精爲梁解者知不止一太后也吾所對帝云云者因勢利導而助爲說獄辭雖具帝可不省覽而聽已移而又奚以燒爲夫遷史即不無脫漏班書即多因遷文乃至承命案獄燒獄辭而以徒手還報此叔一奇節偉事何可脫遺史既已遺而褚爲綴拾使其有實可聽班不應重棄不錄我故以當日情事合馬班兩家而知昌廢之說是齊東之語亡是公之所然笑也且褚所稱叔對帝語獨謂罪在羊勝公孫詭而于梁王無與此則有說可信蓋異日者叔與貫高趙午等謀逆高祖實不使趙王敖知以爲事成則功歸王不成不使王受禍故趙王卒以免誅而貫高田叔輩以此特著叔或以事相傳合遂用以對帝語亦類此夫既蔽獄勝詭而與

梁王無與則獄辭者固坐勝詭而解梁王之具也而胡以燒乎哉

爰盜論

龜錯刻削諸侯身為大僂蓋由與爰盜數不相善盜既擠錯東市而勝之遂使錯被惡聲盜獲眾譽史亦謂錯治申商刑名之學而稱盜仁心為質繆矣余謂盜刻薄少恩傾巧險側殆合刑名縱橫而有之故足以死錯而要之終亦不免也夫絳侯者高帝之所謂安劉氏必勃也豈得非社稷臣哉主新即位而嚴重大臣自盛德事乃首詆訶訐折之欲以聳主聽而賈己名其面折王嘉亦猶是是商鞅之刑黔師傅范雎之攻太后穰侯蔡澤之宣言奪應侯相之意也閑家無術至使侍兒私客亦足羞矣匿情不言而又追賜與之彼其有憐才隱惡之素乎欲以啗人而鉤致其死力將以一侍兒易人軀

妙三十二

五

命也是秦穆公之賜酒食善馬者楚王之一座盡絕纓之術也夫劇孟誠賢盜善待之誠是然後此武帝嘗切齒于魏其武安之招賓客而禍累以滋富人所見不可謂非早識而愛爰氏也盜不聽之卒與孟交斯亦已矣奚事罵之絕不與通蓋不罵富人則好劇孟之說不章不絕不與通則交劇孟之名不固豈以家居失勢無所發舒憑倚名俠自起聲稱乎蓋將曹邱孟而季布我也平原之斬笑贊者美人頭信陵之從賣漿博徒而辭謝平原欲裝為去固四公子相傾之故智也盜最盛德事者無如絳侯繫獄而為之解夫己嘗欲擠人泥塗矣既在泥塗而始掖出之以明德果真長者乎且絳侯無反狀文帝之終不殺勃漢廷臣舉知之盜亦知之矣為解者順風之呼而以飾前此之擊排不為私怨是石顯之尊事貢禹果不諧殺蕭望之矣盜最慷慨直節者無如鉅慎夫人

坐不知其先有一人說故事而借爭執以效忠勤也夫人馳駿足于危阪之顛我止而下之告以履危之不可曰此其上某某陪仆矣人必以為愛我而誰其怨怒之是向者霸陵攬轡之已事也文帝可與忠言近事可為切鑒蓋料之審矣夫第以為名而已則王莽亦撤定陶太后席使不在乘輿幄坐矣蓋蓋之峭刻深內設變詐以立名者類如此若夫吳楚七國之事蓋蓋顯負大罪宜伏重誅竟逃漢法而僅假手梁客何哉夫蓋之議淮南王也曰諸侯太驕必生患可適削地蓋適而削地之諫豈惟賈生言之蓋亦發之矣言出于口而忘之耶是諸侯之宜削也蓋明知之避事而畏首難之名錯遂任之不辭鼂氏之禍使蓋請誅錯時帝憶前語曰削地公亦嘗言之奈何專以為錯罪豈倡言削侯國者固為誅耶則蓋當死且蓋之言曰獨斬錯遣使謝諸侯則兵可無血刃而罷

妙三十二

六

已斬錯矣蓋拜太常使吳矣吳且曰我已為東帝尚誰拜王不見蓋而欲使之將僅以自逃幾至辱命使還報之時帝理前語曰所謂無血刃而罷者安在說前後不相應徒殺一謀臣而奉使無狀則蓋當死且鄧公之以軍事見也曰吳為反謀數十年以誅錯為名意不在錯也錯始畫計而受大僂杜忠臣之口為諸侯報仇非計也若是則蓋以私怨傾錯已顯然矣況謀之數十年彼為吳相受王厚遇者何人乎相之不知是不智也知之不言是不忠也則錯言多受金錢專為蔽匿非過也使帝聞鄧語而還思之刃在其頸矣則蓋又當死然蓋卒不以此伏法者值景帝之歧而自護既以殺錯負慚天下遂怙其非不更誅蓋畏開天下笑口也此非蓋計之得幸也其卒死于梁者我意之則又蓋計之失也何也天下不當傳弟梁王不得為太子竇嬰已早折之矣漢大臣十餘人

昌言之矣夫豈徒竇嬰諸大臣我知自太后而外三尺童子皆不許也盜豈大愚而獨依違其閒借起而爭之固也然梁不怨竇嬰諸臣而獨刺殺盜者意竇嬰諸臣第以爲此漢法之常經吾屬之本分旅進而說所固然爾而盜必有沾沾色喜翹之爲名內以摩切兩宮而外以引繩批根于眾論若以爲主意非我莫持國本非我莫定鋪張直聲于一時而冀望恩私于帝之千秋萬歲後時必傾諸臣以獨見所以梁王之怨卒盜一身安陵郭門之視東市也豈徒天道哉則亦舜知之過人事所宜然矣夫盜故安陵盜子事事以盜爲之天下豈有終身盜而不敗者乎商鞅變法敝于法韓非說難死于說蘇秦成名于辯而刺于辯靈縱舍一盜與雖然豈獨盜盜哉其兄之子種與有謀焉眾辱趙談是温嶠師之所以制錢鳳也日飲毋苛是曹參教之所以容獄市也其他陰謀急知人不及知史不及載者必多如帝方殺弟而諛以高世之行帝正憂吳而驟對以今破矣便調捷給幾如李斯趙高之阿二世中士羞爲之而盜出口不慚豈盡盜所辦或者不肖子弟進熟于前種謀而盜聽之皆未可知後盜之傾身劇孟意儻以用客謀得客力幾有如種者羅而致之乎夫一時倚以應機立事而不知蓄毒禍于方來也然盜有兄子以共其謀錯有父而不善其策禍之遲速豈待問哉悲夫

司馬相如論

相如之識度蓋遠之莊周之亞近之東方朔之流世第以詞人目之非也夫人交物而即繫于物者其心不能出物外也寓物而不與乎物者心常游乎物之先也漢鄒陽枚乘之屬其文辭巨麗何遽不相如若而在吳幾羅吳之禍在梁復任梁之憂纔脫獄中又累刺客皇皇道路媿媿蓋侯其後之勤

于所事是也而始之重喚其餌湛身所暱而與人私謀則過也斯非物之中我者深而我之廢物者固所謂繫物而無以出其外者與若相如未始不為郎也景帝即不好辭賦未聞彼曾上書獻賦不售也相如未始不游梁也梁王詞客甚盛未聞渠于鄒陽之獄介勝詭之間而謀梁家國事也相如又未始不過武帝也武帝好詞賦有不得同時之企想有飄飄凌雲之賞音而相如官不過為郎終身一園令未聞有穹寵厚祿也跡其生平歷事景武出入漢梁多稱病閒居優游澹蕩不肯與公卿國家事何哉蓋其負才擅藻不忍自沒于天地之間則觸事騁辭聊自娛說如卿雲之適見醴泉之一出為漢廷生色耳至其胸懷至足有達昭曠之源超塵蓋之外者是故不遠人亦不近人不遺世亦不入世彼且以漢廷為濠上以文園為漆園以諭蜀通西南為偶然庖丁之一解而

妙三十二

六

以田竇公孫主父吾邱嚴助朱買臣之徒為入廟之犧牲被文繡以就死而已獨逍遙扶搖禦風行而冷然善斯已矣子虛所云吞若雲夢者八九其於胸中曾不芥蒂意殆以自狀而他書稱其意思蕭散不與外事相關釋然以睡渙然以興殆其終身精微之所在豈獨作賦云爾哉一時比肩之臣惟東方曼倩同有此意而詭譎恍惚過之無論其浮沈誕謾不屑意功名富貴者與稱病閒居精指無異而時一莊語不可端倪即諫獵之昌言與宣室上林之偉論亦並卓然矣要兩入者其于正論猶塵垢粃糠也而況其他哉或曰封禪不導諛與曰相如死矣何利而為之其生也引病優游不干權利而死何冀與亦洗洋綺麗之材用之不盡聊以垂文自見夫上古之初七十二君之說猶之謂鯁大不知幾千里也且卒歸于安必思危兢兢翼翼是固以為諷而世繆以為勸也夫



寓言十九彼且詆曾史非仁義而況湯武肅祗之言乎曲終奏雅而以為譏諷矣曰卓氏之事不汙與曰事汙矣後人未之詳考而深論也夫相如以宦游不遂來臨邛非以竊婦來也王吉之繆相敬重亦祇欲程卓諸人知令有重客為治彙中裝已爾及奏琴有相挑之事或亦謂主人知相愛重則王孫可以女歸或文君果亦有心則為請于父母以待禮聘何至夜即亡奔此非相如所及料也夫王孫富人家僮八百相如以一貧困游士來客曾幾時何由知其為文君侍者又安得重資以謝之一讎未終而殷勤已致吾不知向人閨閣云云者語何以開口而曲折層復圖之不得者一貧游士獨捷給乃爾此皆誣罔顯然人不知察後人第當罪相如之不拒亡奔不當謂實由相如所為也且相如固欲處于材不材之間者也納亡之行其不材甚矣其不為將相通侯之器審矣

抄三十二

九

此固相如所樂居之以為不中繩墨足老天年而笑賣嬰李廣公孫賀劉屈氂之青黃文飾也夫應諧似優不窮似智正諫似直穢德似隱豈獨朔哉吾於長卿亦云

蕭望之論上

或曰望之再出不知止矣帝始即位而致師傅于獄事已可見尚再辱與余曰以此時止晚矣夫望之傅太子者也二疏先傅太子也太子年十二二疏即決去其言謂不去懼有後悔夫不去何遠有後悔意姿質情性之間已見其大端岌岌乎有鉗我于市之慮與不則亦懼傅之以德義而匡其不及者未有後效則尸官可勝誅與廣之去意蓋如此若望之之傅太子固其強壯時矣即位之年已二十餘所謂鼓琴吹簫自度曲極要眇者豈一日事與所謂牽制文義優游不斷者豈不有徵驗與宣帝且歎曰亂我家者太子也為之傅者已

八年不一窺見與夫其即位之時尚不知召至廷尉之即爲繫獄也則平日之講經義道古今者安在其臨文蒞事乎八年之中如此類者傳豈不早識與嗟乎同一大傅少傅也廣受早見于十二歲之時而已有後悔之懼望之以八年之久授經於二十餘歲之長君而懵不察其姿質情性之所底兩年再獄遂殺其身吾不惜望之不知止而深惜望之不知人也夫拔巨奸除故事曠然與天下更始此武宣英主之所爲而不當以冀中庸之下之元帝乃出于八年太傅之望之何哉

蕭望之論下

或曰然則傳人主者知其主之不可爲皆潔身去與責如是塞而誼如是起與曰吾不責人以必去其主吾望人以知其主之才分而有所用之以庶幾于有爲也夫帝之多藝不過

妙三十二

年

史書歌曲之能宜知之矣弘恭石顯自宣帝朝筦機樞習故事宜知之彌留憑几受顧命者三人而兩人已極同心僅一史高不過恩澤外戚之候器識材具不逮而位在吾上又宜知之矣夫恭顯以險側刑餘竊據機要此其當去豈待問哉然望之之誤在不量其主在不用史高夫能去恭顯者權在元帝而帝已如此矣則當微論恭顯之人不當驟語以中書不用宦者夫帝已習見先朝任用所謂漢家故事若應然者而遽望以不近刑人帝豈不駭爲非常高遠之事哉但告以去泰去甚使中材之主可勉而及則潛移默奪或可易恭顯而他用其徒使其徒由我進我得制之而後或可徐爲計願以改易制度之事望之巽懦牽拘之人非也夫欲去恭顯當有其助無過史高而高與恭顯又表裏矣古今外戚宦豎未有不相結者與主近而禁地同也吾使之功名之閒有所

其以為樂而後道義之說有可誘以來即不盡為吾用而亦不至驅之于敵以致難于我夫更生金敞之徒濟濟上前稱古則先者非望之所設施邪觀鄭朋龍華輩獻諂攀附卒不可得則當時薦士除吏烜赫可知更生之徒銳意太平必有揚揚輦上走人如鶩者高嘿充位闕如無有心豈能安乎昔者平勃能以王予祿產而祿產遂為所給望之不以一功名與高高乃激而走險何怪焉後唐莊宗之伐蜀也魏王繼岌為元帥郭崇韜副之軍士號令一出崇韜人填其門貨溢其室繼岌帥府寥落如無則崇韜之禍作矣事雖不同勢有相類奈何不略為一樂陵大司馬地而獨自為之也謾之以不足語則恥排之以不可共則忿失宮掖之援蔑應和之力是故禁祕益高而幾事易敗此又望之之拙也夫使帝可有為則高亦奚賴惟望之視帝過其分遂忽視高以為不足援而

妙三十二

三

恭顯乃不可圖矣夫帝固愚庸然于望之分自不薄觀其涕泣不食與終身祠祀勿絕則敬禮望之心獨未盡死者使望之浸漬有漸鼓舞有術用史高之徒參和于宮庭燕寢之間以扶掖其說恭顯之去亦未可知縱不即去而此身未死其設施匡正有裨于漢必多願僅以一剛直不撓殺身塞責惜矣雖然望之秉經守正古大臣風烈見焉與為匡衡而生毋望望之而死吾又奚忍深論之哉

田賦論

今天下無不賦者舟車陂澤之屬靡毫髮遺也而田賦為甚天下之賦無不弊者官胥奸滑紛紜輻輳其中如亂絲然不可理也而田賦之弊為甚惟田之賦最多而取重故田賦之弊最多而害深吾一有以斷之賦取諸田者也欲賦之無弊則先治其田而已田多則賦多多者益多則少者益少多少

縣絕則多能弊以害少亦能弊以害多而墨吏奸胥又展轉焉故賦孔百出而莫可詰欲田之治則先使民田多少不相遠而已此非必奪民業復井授也則斷然限田之法潤澤行之而已矣古者農人受田餘夫口比士工商家五而當一然皆二十受田六十歸田田非民家所得私也田為君有君詳於治田無詭匿偽增之患而賦之源清矣夫古之聖王何嘗不賦民哉師徒工役粟米布縷皆取之民而民不困者田之有無多寡較若畫壹賦之科條期約曉然分明奸人無以措其手則正供不耗于旁費故民無逋賦而國用足也蓋田均則易治田既治則田出之賦因之一國之田賦以幾何目以幾何數數以幾何期期以罷免幾何日一國之有田者無不知也無不見也無倖免無重困也故溯而言之賦不病民者必賦無弊賦無弊者必田無弊田無弊者必田均欲均

妙三十二

五

田則必從限田之法三代之後賢人明主有志復古者嘗慨然于此豈無見也哉吾觀仲舒之言略矣何武師丹之議與魏孝文之所規畫皆有條理次第未見其必屬民也顧未之決行行亦不久者豈限田之為患不力行限田之患也何者師丹何武之建議在張禹占鄭白渠四百餘頃之後人習兼井而丁傅董賢隆貴用事皆不便之事寢不行非真不可行也魏孝文仁明英傑無敢中沮矣值疆宇分裂聲教不通軍旅連年未遑專享國非長而步玉累改亦行之不終非行焉不可者也惟漢武以有為之姿當去古未遠之日董生醇儒首發此議使當日君臣同力行必有成而帝以攻戰神仙忽此本計失可為之時致其事益積重難反誠可惜也雖然欲賦之無弊必不可使田之多寡懸絕且限田何不可行之有何武之議魏孝文之施為自王侯公主刺史太守治中別

駕之類以官品序次為多少是限有差等也民所受者露田  
 諸世業桑田不在還受之例是限有分別也遲以歲年樂遷  
 者聽逐空荒是限有漸漬也又有盈者無受不還不足者受  
 種如法盈者得賣其盈不足者得買所不足不得賣其分亦  
 不買過所足是限田有所由來也此皆非強奪人田以為公  
 田但不得各踰所限以恣奸利爾此其意可師而事可損益  
 為之者豈王莽之影響周官哉嗟乎田不過多益有數善乃  
 其大要在教吏以廉今其制既定士大夫知膏腴延袤者舉  
 非我有也是灌夫不得以橫潁川而田蚡不可以請城南者  
 也由是貪墨無所庸貪墨無所庸則不至剝削小民以自飽  
 官不剝民民心歡洽則入事父兄出事長上平居不欺其吏  
 而有急不叛其君皆自限田始區區賦稅又奚難焉夫井田  
 必不可復而限田決所可行謂限田為非是者非俗儒之不  
 學即貪吏之營私其意蓋將自便身圖也哉

妙三十二

重

兵制論

今兵農之不能一也如封建井田必不可復者然然而事理  
 不同實非不可復也封建者王畿之外盡捐我之土以予人  
 盡捐我之土以予人勢均力侔久而無事者未之有井田者  
 一人之寡遠盡取民之土以自有盡取民之土以自有物盛  
 芽孽久而不弊者亦未之有是二者利闢而害則大故可以  
 無復亦卒不可復夫兵農合一之制則不然民不可一日無  
 君長者也不可一日無菽粟者也以不可一日無者或盡與  
 之或盡奪之斯患有所起是故封建井田有別論焉爾若夫  
 兵非日日用者也或數十年不用或百餘年不用而不可不  
 有其一旦之用若是者非藏之民因之農則不可蓋今召募  
 為兵農出金粟輸之官而官給養之也曰此吾兵也既別異

之以厚糈矣故雖無盜賊之警攻戰之事亦時習其容觀器  
技以明吾之用然實無盜賊之警攻戰之事也則所謂容觀  
器技狎而玩焉如兒戲矣為之主者勢不得以無所用之事  
日苦人以有為故聽其商賈備作耕藝無不之也而不奪其  
兵之糈及數十年或百餘年而一用向狎而玩者今乃如駭  
鹿然以為吾所素習何嘗至是而今有之且夫食厚饌飽妻  
子者皆數十年或百餘年中入非我始有也彼其人何往乎  
我適承之而遽責以死蓋不能所以事至而用其不任戰不  
受甲與農夫等顧獨罷農以供之甚無謂也且夫農自出糈  
以來曰捐身命赴死亡者有人矣吾悉力以飼之久矣吾出  
而作入而息即一旦有事何與哉而不知其所飼之勞且久  
者其無用與若等夫設兵雖多不多于民就使兵皆可用一  
郡邑之中忘戰者已十之九一旦有事盡數十萬人皆無用

抄三十二

五

而謂數百十人足捍衛之勢亦不濟況此百十人又復爾也  
天下之事是以大敗其患皆緣于蠹民以媮兵又蠹農使不  
知兵而已向使此事或歲月數見或數歲一見則兵之玩狎  
如兒戲者當亦有所震撼淬厲以自新其苟且之習而農之  
悉力飼兵者亦早見兵之無能為我衛則羣自精其劍戟擊  
刺之狀而不待命于兵庶幾事起有備乃卒以數十年或百  
餘年一用之事優游媮惰于積久而驚悸糜爛於臨時又使  
有意飭新之人每苦積重難返而更張之莫及兵農不一之  
害豈不太甚已哉故不若即民而兵之即民而兵之是盡民  
而兵也盡民而兵則凡萬家之邑十室之聚固不有戰士焉  
兵可勝用乎盡兵而兵則雖百年不試人有干戈之氣雖一  
日乍用呼之立集兵可勝用乎省虛糜之費免召募之勞減  
容調之擾廣糾桓之路無銷兵汰士見虛于天下之形有月

屬歲試伏大險于不見之際三代聖王之制至今不可易者此是也而奈何二之疑者曰無妨農與夫力作有時講武有節有故事矣凡麋鹿之逐射御之攻鋤耒耨向棘為稼穡設者皆兵事也精而治之即兵與農兼舉爾今天下農之黠者皆竄籍戎伍食兵餼也而未嘗廢其農之實兵之黠者皆專力畦剛收農利也而未嘗損其兵之名上之人不合而下私合之是以兩冒而兩做上合之則均修矣然其制奈何必如古之鉤連繩貫委曲繁難溝血塗遂定其居然後比閭族黨詳其事與是又膠固糾紛之說所以便苟安而阻復古也吾為淺言之易言之則唐之府兵具其略後世之屯田有其端夫唐去三代豈不遠哉府兵之法一寓之農其居處教養畜材待事動作休息皆有節自然皆耕于野之民也有事則命將以出事解輒罷兵散于府將歸于朝士不失業而將帥無握

妙三十二

五

兵之患歐陽子以為得古之大意斯豈非井田既壞之後三代之制猶有存之者哉若由屯田引伸之則尤較然易見者可以吾戰卒耕而不害其戰則亦可以吾耕夫戰而不傷其耕以邊關障塞之卒秋高刈穫正虜騎衝突之時而耕與戰不廢則以郡國膏沃之農安居滌場習鹽禽蒐獸之利而苦樂難易其可行與否又奚待問哉大府兵之法都尉長史亦繁有徒橫刀礪石厥器不一可考而知可做而行也其大旨則農可為兵而已屯田之言清兼并給耕資邊防內地所在異宜而其要歸亦兵自為農而已故吾不高言三代之規而以府兵屯田近言之精修二者之事則兵制瞭然矣由屯田以復府兵由府兵而堅持之毋致變為曠騎童奴即三代之治至今存可也夫八門五花戰勝攻取之說皆用兵者也兵制不定則無兵無兵安所得用之兵制之難定也以其事非

日用之者或數十年或百餘年而一試當其未試莫知其利害而至其已用常苦于究圖之不及然兵制之可以定亦以其事非日用之者或數十年或百餘年而始試當其不試可以變革推移之及其久而後試則吾已馴習優游漸積矣舉而之于三代耳目不驚服習有素故也此奈何與封建井田并皮關哉吾故以合兵農而一之是制兵之本論也

將兵論

兵非不貴多不能多也非兵不能多將兵者不能多也韓信之對漢高謂帝所將不過十萬信乃多多益善豈非少易為力而多難其才哉今之治兵者吾惑焉無論文臣武帥大將偏裨一以多兵為請是淮陰所難者人人辦之也今文吏黜陟有繁簡之調亦以理繁劇者任難勝受簡僻者責易塞也兵之多寡其為繁簡也甚矣人人自請能勝其繁吾敢信與

妙三十二

三

昔為賈料子玉之敗謂剛而無禮過三百乘其不能入矣然則不三百乘猶將全師也夫將苟徒剛兵將速敗況中情怯懦而恃多為援者乎李信議取荆請以二十萬往王翦謂非六十萬不可後信果無功然使舉六十萬而授之信其敗之甚又何如哉用廣其器應博則凶苟非翦也將即他人能以六十萬勝乎秋山之詆張湯也武帝作色謂吾使生居一郡能無使虜入盜乎山曰不能又曰居一縣曰不能復曰居一障間山自度辨窮且下吏乃曰能武之所以難山與山之所以自處者其次第可見使山居一郡一縣斬山頭而去豈待月餘哉比而觀之類可推矣今治兵者一以多為請何也吾非謂少兵足以勝敵也才任百夫者長百夫才任千夫者長千夫層累而上各揣己分能將幾何而不務多以為恃合千百夫長焉則千人矣合百千夫長焉則十萬人矣層累而上



皆揣己分能將幾何而不務多以為恃蓋必少焉而效則多之  
多焉而效則愈益多之其兢兢受卒與受官同至有受官  
益尊受卒益少者斯即淮陰不將兵而將將之意吾謂將之  
自處與上所以處將者宜準諸此夫起徒步之中遂為大將  
將百萬之眾者亦韓信一人而已唐之李郭宋之狄青韓世  
忠輩咸自身將或卒伍漸積起家其多寡能否可次第知也  
故將兵者無務多斯奧術也

明見萬里之外論

古之英主其于天下之事舉凡天命人心倚伏向背之幾成  
敗禍福轉移操縱之術莫不有以逸巡廟堂而坐制遐外談  
笑几席而洞矚幽陰沉乎身經百戰慮切三分私喙息者有  
人竊土宇者有人我之力足以制彼而彼不投命彼之勢當  
折而入我而且未脫然為我臣則夫橫人之說連雞之談必

妙三十一

五

有乘其閒而思動其聽者矣我伐其謀而中其所甚忌則可  
以使彼交駭而易所圖此在中智之主猶能料之所謂已見  
其形非徒察其影也而以難楚夷羣雄光復大業之世祖哉  
世祖賜賈融書史稱河西咸驚以為天子明見萬里之外以  
今論之非史氏之夸辭則河西之驚下夫世祖英主也此亦  
何難見之有哉蓋當時河西諸郡如酒泉張掖金城之屬咸  
斗絕匈奴特遠東面起事乎此固難出而爭地中原矣即事  
成如尉陀晝然自王一隅則已此明而熟于計者皆見之也  
然河西不足以爭天下而可為爭天下者之資其與隴蜀地  
相接勢相連也隴得之而重蜀受之而饒各欲招徠使相附  
益又明而熟于計者皆見之也夫天下强者一而當弱者幾  
前乎此者秦強而六國弱故六國合而拒秦後乎此者吳蜀  
弱而魏強故吳蜀合而抗魏夫世祖之于隴蜀豈可以強弱

論哉梁趙既舉四關咸定天水益州徒欲以區區之螳臂抗延歲月其有不駕謀臣遣辯士虛辭眇論以要質于河西者無有矣此又不明而熟于計者皆見之也而謂沈雄敏略如世祖者顧難及此哉且融也中智愿謹人也世祖料之矣河西數年宴然富殖意在安百姓而已東向之心日夜不置世祖又料之矣蓋不過一圖書姓號之說已足以破其膽而洛陽土地甲兵之盛已有以懾其心彼任嚮之計鼎足之說我知其必有而又量其不必從也知其必有而又量其不必從璽書聊一及之逆發其行人之辭而激決其小心精詳之慮融之惶恐歸忱一意東向遂絕季孟委身朝廷豈待讀書辭之畢哉故凡此者皆不足爲世祖難也而河西之人輒相驚服者融固長厚之質意其所召州郡計議皆中智之姿所謂俗質樸而政寬和其一時人才意可知也故遂以此爲萬里

妙三十一

矣

之明與然吾又謂融當更始之初即能留意河西卒就功業撫結豪傑遠折戎羌而梁統史苞竺曾庫鈞諸輩相與有成皆以功名終既自決策又能顯書責讓隗囂者豈不謂張玄之說庸人之所必料而明主知其必至無足異者乃以此驚聖天子之明哉此飾說也余故謂非河西之騫下則史氏之夸辭也史臣又謂帝積苦兵閒嘗指囂述曰且當置兩子于度外夫帝豈置兩子于度外者哉帝即端謹直柔無大陰譎狡詭之習其于天下大計未嘗不熟思而審處矣嘗欲招融以逼囂故自料囂之連融此不過一多算之長料敵之智帝饒爲之而何遂驚絕若此乎吾所嘉歎于此者璽書有云王者有分土無分民大哉數語安所得三代聖王之說而稱之而所見之明無論也且夫伯升死而自如昆陽圍而不懼更始遣而遂自貳交通書焚而反側安一時急智明略出人意見

外者何限而其大如抑遠椒房之親以防后戚寵功臣之事  
任卒善全其家有遂為後世法者此所謂瞻言百里帝之至  
明而不在于區區河西之間也

妙三十二

元

嶧桐文集卷第五

嶧桐文集卷第六

二妙集三十三

貴池劉城伯宗著

說

封疆局面說

臣居恆嘗著狂說曰昔唐有牛李維州之議我明有熊王河  
 東西之爭世之相去久遠若合一轍蓋維州之議言各有故  
 而德裕之見為長牛所以敗德裕之成者意不在維州而在  
 惡其素異己李所以怨僧孺者事亦不始維州而以其不同  
 黨而早攻之議牛李不議維州是以雖執悉怛謀于境上塞  
 遠人歸化之路而不顧也我河東西之爭亦各有功過而廷  
 弼之才為優要祖王者文致廷弼之過非從河東起見而特  
 以居右屯者之為熊袒熊者厚誅化貞之罪亦非論河西而  
 特以棄廣寧者之為王爭熊王不爭河東西是以雖比武長

妙三十三

卷六

一

春于西市不坐失陷封疆之律而亦不恤也若是者今士大  
 夫所謂封疆局面也我皇上手艾逆類與世廓清蕩蕩乎平  
 有何畛域而年來政府中樞仍因陋習橫設成心意所可否  
 借題升墜皇上虛公無我第以為法應如是不知中與有人  
 以封疆之名護局面之實大臣罔上行私殆不可問也往者  
 已已  
 崇煥磔死矣舊輔逮治繫中本兵瘐死園中  
 斥逐清貞之戎政比誅正直之晉撫愚臣曰法應如是爾後  
 微聞之士大夫曰一二新參欲除異己巧設陰中使麗干法  
 豈其然乎臣不敢信也迨丙子夏秋  
 猶故也攻陷  
 城邑殺掠吏民猶故也捆載輜重徜徉而去莫敢以一矢相  
 加猶故也乃閣臣緣以進階大璫且將延世觀軍袖手普被  
 渥恩本兵怖死思邀厚恤若是者以視己已何罪同而罰異  
 事一而賞殊哉果皇上之恩威不測抑柄臣之操縱有心欲

公孤之及已則先以金吾與人欲縱舍同黨之罪故褒嘉在  
事之功臣感事至此局面之說雖欲不信不可得矣今在  
內地又數月所破州邑已二十餘焚掠淫殺不可殫述無能  
堂堂一戰徒有紙上功級其狀殆與己已丙子等臣憂心京  
京畏此翱翔不已然或徼天之幸出之後不知東國者作  
何舉錯也雖然聞諸道路已有萌芽拔自閑曹置之樞屬邊  
才之選皆其能驅我異志者也奪其清華擠之險地行閒之  
用即其顯與意忤者也此形一兆封疆與否局面與否稍有  
智者不已料乎昔唐相盧杞惡顏真卿之抗己以李希烈反  
請用重臣夙望如真卿者往諭之是豈不陽與顏以美名而  
死不可脫矣我明嚴嵩以虜薄城下惡趙貞吉抗言刺己即  
傾擠貞吉以翰林兼御史齎賞出城幾陷之死賴我世宗皇  
帝仁聖僅從降謫而嵩志快矣若是者文子封疆實予局面

妙三十三

二

往往而然今茲為甚夫局面得矣封疆則不忍言臣為此鯁  
鯁過計非以贅說既往亦欲懲戒將來也

風聞言事說

自古國家之治亂惟在言路之通塞開天下之口則上下之  
情畢達人無容其奸否則中外阻深而事莫知其狀宋臣蘇  
軾有云凡權奸之禍其始以臺諫折之而有餘其後以干戈  
取之而不足有味哉斯言可畏哉斯言也我太祖高皇帝著  
之祖訓曰凡廣耳目不偏聽所以防壅蔽而通下情也今後  
大小官員並百工伎藝之人應有可言之事許直至御前聞  
奏其言當理即付所司施行諸衙門毋得阻滯違者即同奸  
論大哉聖謨垂慮深遠矣曰大小官員百工伎藝是不必有  
言責立朝班者皆可言也又曰應有可言之事至御前聞奏  
是不必大機密大急切者皆許言也又曰其言當理即付所

司施行未嘗曰不當理者如何處治如何斥絕也凡以廣諫諍之路則無人不當言廓聰明之途則無事不可言又以靈過而存之以招徠言者無預屢其法以杜絕來告之門然後忠言至計得入于耳也列聖相承遵用諸人直言無隱之諭而不禁風聞言事之條以仰承高皇睿慮鼓舞言者率此道爾或者曰機密不可洩臣曰情形當其知夫我用兵防略出師程期與夫翦除肘腋之奸更革城社之蠱變在呼吸祕同鬼神者所謂機密也此不容洩矣若夫

城堡

陷失之詳攻圍今在何所守禦方有幾端此情形也謂宜傳布臣僚得其知見不煩懸揣可以詳籌人竭芻蕘眾效策力執兩端而用中未必無補今概絕鈔傳閉人耳目雖欲進言無可言者是陽無拒言之名陰有杜言之實非計之得也或者曰譌言惑眾宜禁臣曰風聞言事不妨夫倡興邪教傳播

妙三十三

三

機祥事無端而稱引讖緯賊無影而煽鼓逃亡使人惶駭無有固志此所謂譌言也誠宜禁矣若夫奸已謀而未露事有實而無形道路業已流傳特未聞之黼座通國甚多口語第難坐以主名此風聞也謂宜有聞即告勿用稽遲恐遂事則不及圖即未確亦何妨過計臣見先朝名臣奏稿每稱近日聞得云云或曰外間傳說云云當時據以入疏朝廷亦不詰所從來凡以事必待乎親見雖聖人亦有不能語既傳之通國此說必非無自即俟徐察言者無罪蓋寬待夫不必然之言以冀得乎有必然之言爾今預行阻止概等誣罔雖事有當言誰肯言者是明為廷臣阻敢言之氣陰為奸人快誰何之思非計之得也夫明者見于未形尚先事而料其必至況眾人已實有口奈何置之罔聞必待事勢既成證佐咸具而後許人言則蘇軾又有言矣謂天下事其始言之嘗可為而

每苦于不見信其後言之既見信而又苦于不及為豈不痛哉從古帝王縣鞞鐸以招甚且設誹謗之木故不至欺蔽隔絕漏網于吞舟元時命相詔有云諸衙門敢有越中書奏請者以違制論高皇帝嘗引為殷鑒言路通塞之致亦概可知矣伏惟皇上體高皇帝垂訓之深心用列聖許言之明諭靈開入告之門無先設辭以拒靈使風聞之言未確毋使成事之說無庸則今日幸甚天下幸甚

將權說

古者將在外君命有所不受又曰閫以外將軍制之此言用兵之際呼吸變化得專便宜而非語于平居守官擁兵坐鎮之日也古者卒皆農將皆卿大夫士兵休事已則各還其故而一無所有是以用兵之時予以其權究無極重不返之患後世則不然兵恆為兵將恆為將終其身操可以殺人之器

妙三三

四

矣我復縱舍羈勒不為之制勢必至狂走而速害故漢唐宋之明主極馳騁其力于行閒而收魁柄于閒日一坐小法芟刈不遺嗚呼豈無見也哉我太祖高皇帝草昧開天率鷹揚之佐其時任過頗隆即建官列爵武亦階崇而地峻數十年閒韓彭趙醢若雉草然中山開平而外亦僅僅矣此非用法之嚴夫有所不得已于其閒也列聖垂衣文儒輩進將權日輕中閒事起數端初作難皆不始于兜鍪虎臣明制之善亦可見矣皇上以時值多故蹈白刃冒流矢非若屬不能欲登進其氣崇體貌以優之閒與左班騎斲必屈此以相伸意勤至焉然愚觀繩墨之拘牽如故賢者未嘗盡其才而虛加之文事勢漸漬桀驁者已有以遂其非僭端見矣夫戰陣之事進退生殺大將得行于偏裨偏裨得行于卒伍此所謂權也不此之務而階列公孤力推文吏口語勃蹊必勝後已見賊

不戰徜徉自如擁兵道遙人莫敢問此則長驕習傲作孽之梯耳烏覩所為權哉然而鳩毒所播延及草木狹狗既斃齧傷已多欲重將權者奈何不思為之所也

箴

非箴

戊子歲六月二十二日偶念踰一日則行年五十一矣循省多愆作非箴矢警焉

百年大期半已虛擲君子知非聖人學易顧爾何人戲渝罔惜動念或違其儀則辟爾始衰矣人亦爾射告爾敬共母以情縱曰欲與思均敝厥躬請窒其隙初難易終忿平躁釋與物從容以祈寡過亦保冲融

銘

研銘

妙三十三

五

爾中剛而外能受物日與交而不損其固有爾德可師師爾則壽

又

石其天也温而潤所以全也吾鑒子以自堅也

圓研銘

友人貽圓研一約徑一尺圍三尺凸其中水道環之石質非佳而義類可思也為銘曰

質者義圓則智多容而無恣是謂大器嶧桐曰吾斯以為志

贊

湯半李像贊

湯半李有畫像自謂不甚似已陳眉公徵君書所作鄴侯贊于其上半李曰謾也或曰豈無意哉眉公之于半李嘗以子妻之



吳與越不能有其人湯與李不能系其生儒與俠不能定其精神之所存則丹青者誰乃責以恆似其形時似其神古之英雄善藏其用莫可測識者雖朝夕覲面如未聞名是以鄴侯功存唐室位極人臣而就見其珊然之骨視此一飄塵我思張子房亦猶是也其人宜魁梧奇偉嗟乎亦烏知圖之者之果似與真

孔中甫太史像贊

蕭然絕塵者其氣清邪瑩然遠映者其神凝邪深衣幅巾望之儼然無論識與不識皆知其為貞臣邪或以為太邱道廣或以為仲舉節峻此兩人者皆似之而未盡

蜀人劉嘉復像贊

有美年少翩翩秀媚其立也如望其將行而屢顧也若有深思而不捐其望者意岷江之峨峨盈牀之笏斯在其不能捐者必父書之在笈言世務以成編古之人狀貌著于記牒今吾家通侯將以茲圖畫傳

妙三十三

六

陳中湛中丞像贊

維公之生夢徵虎祥維公之仕難作貂璫公之再起帝堯明明公之卒躡平津彭彭是以公方嚮用則山之蒺藜不傷公既斥退則朝之鹿馬方張公能以未死之身待旭日之大璜公不能以必行之志抗偃月之中堂嗚呼天與人與世止小康我瞻遺像風烈未亡讀父書者其毋忘乃志承先學者吾儕咸不易其方

吳檀像贊

有酒可漉有茗可烹有石流可枕漱有卷籍可諷吟有宗族交游雲蒸霞蔚可晤對為樂或曰此去儒而隱或曰此俠而託之耕者與

甯峒像贊

史遷有言留侯狀貌宜魁梧奇偉也而圖畫如婦人好女我觀山同白哲少年美如冠玉也今色加赭而頰上之毛又如許兩者不皆差迕與然其髮既斷而鬢鬢下垂目炯炯而似有所延伫坐大石以盤桓揮如意而若舞蓋內有所得而吐棄世之鳴嚇腐鼠山同之神正在阿堵誰謂人不可以貌取乎

劉遠公扁舟江上圖贊

滔滔皆是狂倒無底計將安之乘桴逆爾桂檝蘭橈采蘅寧苙衣無新製書有舊史冠追雲切神隨風起凡此皆所以喻芳潔而精道理也夫豈徒虛相觸而不怒夜藏壑而善徙與自章江維解滕閣帆開南浦雲埋西山雨灑或以為幼安浮海之風或以為越石擊楫之指要之送君者自厓返君自此

遠矣

抄三十三

七

甯峒像又贊

三年之內圖畫再易無改須眉增此巾幘巾幘既復貌亦改觀我再作贊石亦生歡

書

上池太道史公辭免選舉書

城章縫賤士樸邀庸人下帷讀書不問外事有年矣二月間忽奉明公檄召時郡邑君侯闔扉閱試牘城無所稟命僕夫控騎來趣過發渡江庭見則蒙明公與論文章勉行誼激厲氣節倦切正人云城爾時如蘇轍語見賢人之光耀聞一言以自壯私心欣懌如是而已歸謁邑侯顧露微指謂明公將以城姓名塞明詔者始惶駭汗下道路之口流傳滋多反覆躊躇亟圖放免以未奉明教議難自發又思漢臣有云言之

爲先事不言則情不達故卒言之三月癸戰臨池城輒自陳  
白乃數語未終而明公莊色相待軌逆折之城分卑氣餒遂  
不敢畢其說雖然竊再四思之矣城今日冒犯顏色強聒而  
前其罪小使隱忍不言卒有一蹉跌內負平生上累明公知  
人之哲其罪大敢嘿嘿而已乎蓋城志有所未安者一才有  
所不逮者三而時勢之不可不與焉念城自屈首受書意用  
遠大同學少年多不賤矣已獨鹿鹿行伍蔑有著見夫年非  
遲暮寧塵衰竭之憂家用粗安無資升斗之潤而中道棄捐  
以諸生身出曰非戰之罪去而救時其誰信之此所謂志有  
所未安者也城少溺辭章長工傳注蠹魚脈望似有夙因居  
恆辨志使得畢諸生事願如子雲所云不受三歲之奉休脫  
直事之由肆心廣意觀書石渠上則傳經勒史次乃鼓吹風  
騷譯聖揚休固不多讓若刑名錢穀別有能人非所敢任今

妙三十三

八

翩然反之以彼易此不逮者一城資稟羸弱不耐極勞雖廉  
潔抗直已分事爾而簿書煩疊奸宄其中度不能如廣漢翁  
歸敏給足辦汲黯有言曰臣有狗馬病不任郡事出入禁闥  
補過拾遺臣之願也城誠似之今以狂怯之姿驟受不習之  
事鉤距籍記萬不稱任而意所可否又以非職噤不得言韓  
愈所稱抑而行之必發狂疾以彼易此不逮者二城曲局迂  
謹固敢跼弛已食餼多年見庠序爲人才根本而臬比非人  
模範蕩廢途窮日暮相率傾邪自念倘不能他有發舒猶資  
比格則經師人師尚堪驅策宋胡安定我思景行之夫子衿  
問宇經義析疑以視胥隸呵呼訟牒紛翯事較逸而功亦相  
當矣今投之民社釋所雍容急圖搏割意願乖反用違其能  
以彼易此不逮者三夫城原習舉業志雜進取非有務光不  
仕之高嵇生不堪之誕也又今除拜有志銓選在人非能如

古度才而處量能而官也然城以爲繇糊名易書射策次第以進則人與職相遭于不可知命也如何試可而已今上也明以此徵下也明以此應而乃知不可而冒爲任不顧能否冀倖有成豈理也哉至若帶甲滿地必居蓋用凶事之窮科目盈庭當得適從何來之謂此則時勢未易取共之情而非城之所屑慮也夫士誠審己度才不容苟可則聖天子明公卿必無強人以官之事往者崇仁新會名動闕廷業有束帛之使亦赴典銓之門而引決不回卒能自遂雖其人與事非城所例而士之自守聖賢爲師何遽不可引以爲裁乎況此事在明公猶可亟止伏望隣城志有未安察城才有不逮諒兢兢猶潔非盤錯之長即區區藝文豈煩劇之用別訪通儒稱塞詔旨庶城不至上累明公而明公亦不至下誤不肖是乃所謂誦于不知己而伸于知己也則不肖幸甚國家幸甚

妙三十三

九

冒昧陳佈主臣

上池州郡守石公舉吳次尾自代書

池有天幸邀惠主爵者以明公蒞而治之蕞爾江城遂屹然重鎮父老欣欣咸爲明公加額而不肖城于今應試外絕未一望見顏色者去年秋冬與友生講藝白門歸來鍵戶讀書公庭嚴肅無緣得至疏賤子矜分固應爾也昨者備兵憲使史公移檄召城城趨而往謁辱論文字勉行誼植節持身諄諄惓切城私自念以舉業浮稱遂動尊者之聽而賜之訓辭至此此厚幸矣已見邑令則顧語曰茲行也殆將以生塞詔旨稱選舉者然某與郡君侯實亦推擇生云城時舌橋駭汗即面陳不可于言次已又列上具辭聽高不報城乃滋懼或曰主上銳意鄧隆旁求俊乂嚴旨趣督必不可已生而乞免誰其任之不肖反覆思維竊有以處此矣夫舉爾所知古聖

之明訓也推賢自代昔士之芳規也城有友人貴池縣學生吳應箕者少負奇姿壯研名理績學則子長孟堅之流危行蓋李膺范滂之屬魯連之辯杜口千人元龍之氣聳身百尺而人所尤難城最畏服者謀君國之事析利弊之由畫地指天絲連繩貫又性諳糾紛略優摘伏度錢穀刑名簿書期會之事觸之直迎刃解爾使其勝任愉快知古潁川渤海治狀非夸也蓋嘗約略計之以城當應箕學不如十之三識不如十之五才不如十之七膽不如十之九城徒以狷訥端愚誤入箠庫之選箕峻博雄杰反逸夾袋之知如天下何如明公知人之哲何即欲渡江謁陳多所未便伏望俯垂清察亟拔英能列牘當道許以箕代斥鴛駘而登騏驎黜嫫母而進夷光使天下後世受良臣之福而誦明公立賢之功不衰則宗社幸甚又使城遠罪戾遣樊英殷浩之譏身名無累則不肖

妙三十三

十

幸甚冒昧竭拳拳惟執事實圖利之

辭江西方伯張公薦舉書

竊惟旁求俊乂者聖主之雄圖也以人事君者大臣之盛節也審才度務量而後入不苟自進者貞士之恆操也使一目之羅可以盡士堂吏之簿足以見才則國家不得非常之人安所得立非常之事使侍從貴重之臣承明問而中沮惟蔽賢嫉能之是圖或舉非其人以私暱猥庸為稱塞是廢格德意營便己私人臣不忠之大者矣又使為士者感奮知己之遭激切功名之會己分未審情義不詳而冒昧一出有同嘗試究至事機乖忤建樹無聞豈惟自負生平亦以累大臣知人之明重失主上求賢之意也今皇上悼吏治敝壞資格牽拘知科目之途已狹保舉之事近真慨然明詔亟行徵選復唐虞三代與我明已效之法此雄圖也遂有明公不以無才

爲對不以親故黨舉疏賤如城阻越江界既從未樞趣于提  
命又無葭莘之親交游之容于左右徒采聽聲聞賍之夾袋  
何所投契相信遽深部牘已行而乃聞之下走此盛節也顧  
城所自爲則伏而思之矣人各有能有不能此存乎己者也  
事有可爲不可爲此存乎時者也去年春正兵備史公已嘗  
采擇見及遣騎來迎深論世務示意必用城退而具書郡公  
求爲沮止中閒自述志未安者一才不逮者三今即以別紙  
呈覽不復更說是則城之審己亦既知所不能矣而事不可  
爲前書小略今具言之夫徵選之典列聖所行神廟初年猶  
一再見曠而不舉僅數十年今皇上毅然獨復而貴臣之意  
弗善秉銓之地勿便也制舉諸公詫爲異類羣擲揄之已見  
端矣由是兵荒險阻盡爲機穿之鄉侮謾擠排共肆摧殘之  
力雖東西南北惟命所之盤根錯節亦何不利而伎倆出于

妙三十三

十一

陰中折辱非人所堪堂堂丈夫徒死無名學術安在此甚不  
可也又今世路險巇人情叵測所舉無多待舉者眾就使暗  
中摸索平流並進忌伎不無而況拔擢裒然恐杜賢害寵不  
止絳灌之屬矣風波微起制科承之無兩榜之人爲之氣力  
有立槁爾圖君之念空殷澤民之功難就此又大不可者也  
是所謂事有可爲不可爲合之城各有能有不能斯亦可以  
蚤自裁矣去秋就試白門伏接手書躊躇改歲尚未勒復以  
決志不出辭費無庸且小禮苛節非明公所以責不肖者然  
卒思之昨既佈腹心于史公今敢不盡悃款于執事惟執事  
憐而察之追還去牘別舉賢才是明公不以愛人者誤人而  
不肖亦不以謬相附者致相累也如謂部文已達事不中易  
則不肖更正言之古之君子出處之際寧恬無躁寧三讓而  
升無一呼遽至豈徒明禮亦以觀時是雖部檄星馳乞許賤

軀雲臥不敢不預白也惟明公舉大度之事擇不肖于闕絕不相謀之中故不肖吐銜口之言盡狂愚于不忌諱之側伸紙竭拳拳惟明公裁察

再與張公書

明公以三十年名德重望敷歷中外鄉里聞石慶循謹之風方岳著君陳保釐之績顧即入登三事簡在一人爲社稷生民所倚藉者也則培養人才拔擢取正爲大臣第一義而今茲之役以不肖爲隗始不幾累知人之哲乎春閒披瀝奏記冀回尊聽以事得中止爲禱未幾史公符牒下郡云明公先有到部之文史公且受重薦之駁若是則城雖獲免于此必被推于彼又奈之何哉仲夏咨到郡邑來趣時以歲試之後偶有負薪之憂已具一呈祈免起送夫城幼工舉業即係干祿之思況際聖明有何鑿坏之節然私嘗忖度今日事勢真

妙三十三

三

如救焚拯溺然第陳奮揭具綆缶有濟于事豈必焦頭爛額之爲若褰裳濡足與汨俱沒者非所笑夫從井救人者哉苟如昔人朝廷若待神明至竟無他異又大僂也量而後入古訓昭然況與病會豈敢造次若夫知己之感即中心藏之無斃矣風便具聞伏惟裁察

答黃赤子論保舉書

三月十九日城頓首赤子足下城無似時苦應酬是日正對客語接良書展誦屢幅不得了客從旁詢之移時讀竟竦然動色汗雨下客益怪問乃徐語之曰此孝感有道黃赤子書也客故多知赤子文章名城故知赤子不但以文章名昔者易曷侯劉瞿若雍石蓮皆能道赤子行誼略城先後從行卷中想見須眉不啻屋梁月色即不敢過揚之抑亦濂洛關閩之徒矣則相與長言之可乎夫我輩之所以見知于世者徒

以舉子業爾而世之知我輩舉子業者徒以二三帖學諸生爾我輩之舉子業雖如此何嘗用之生一人濟一事而世之不為我輩之如此舉子業者率得氣去羣操生人之器而反用以殺人且率一世之人化為賊以相殺故謂我輩舉子業一道足以救世此不足信者置之勿復道可也夫惻隱之心所性而有而道濟天下之學又夙昔所求然則遂但已乎觀今日之事壞敗已極非登王途非據可為之地分則斷無能措手即聖主亦謂人才不盡制科中特復行徵辟顧今徵辟又何可言哉聖主側席之意如彼大臣摧折之心如此應之者逡巡如此旁觀者揶揄如彼無論傳說呂望即下之王猛張寶其人縛騏驎之足而責之日行千里有是理哉然此不足道也吳康齋應徵陛見豈無志當世者堅辭館職意有啟沃微衷而南陽不悟遂乃決志還山陳白沙一代真儒吏部

妙三十三

三

欲考而受職致使身赴銓司稱疾至再而主爵者自如不知當日吏部堂皇之上作何面目然此又不足道也唐荆川之出也以目見東南倭患熨嬰兒剖孕婦慘烈切肌于是犯險蹈疑遂以趙文華之薦亦乘之以出此真以惻隱之心欲行不忍人之政救斯人于水火也而議者訛之至今為口實不知荆川出處原商之達夫達夫諒于當時而多口吠于身後賢者用世其苦如此我輩自顧未如康齋白沙荆川而今日人情事勢又大不如三公時夫人所自立身名已爾道義所繫豈敢苟然是故再四審處不欲鹵莽一出者非曰立而視其死亦重有所不得已爾陳士業沈眉生學問聲實百倍于城尚復逡巡何況城乎識者有謂為達夫易為荆川難城亦欲二子為其難許我為其易者爾已雖然凡此刺刺皆已分外事亦予所謂末也請循其本本立而一身一室有救世之



具即前此刺刺無庸矣蓋制舉之業本乎砥行砥行之本先在倫常倫常之本要在不貪不貪則無欲無欲則理明理明則君臣父子之閒無他端以替之而得專一于忠孝節義之事夫忠孝節義之事修之一室使子弟臧獲有相觀而善者可以救世之爭弑賊奪而循之大道矣即忠孝節義之事存之一身而性命不至漸滅亦可以救世之爭弑賊奪而勿死其心矣夫救人之田宅廬舍也此則安居正路也救人之妻孥僕妾也此則親戚上下也洪水夷狄猛獸之害不烈于無父無君也有其救之者其心其事一而已矣如是則舉子業之遇合與否可勿論而在朝在野吾無擇焉皆有以內解于惻隱之心而外不假夫吏部審官之事孟子曰不得志修身見于世夫見于世而所以云救者至矣夫子曰欲仁而得仁又焉貪則夫赤子之所謂貪功貪名貪文章之皆足以殘天

妙三十三

四

下者欲仁則皆無之城所謂不貪則無欲無欲則理明者貪與欲又未可概論也嗟乎以文章救世者昌黎韓子是也然其文非所謂場屋舉子文也三上宰相書數及宰相門者亦韓子救世急也然其事又非今日所可爲也幸無康齋石亨之嫌未至白沙吏部之辱不敢學荆川柳下惠之可請從事吾孟夫子脩身見世之說是不肖所以全吾惻隱之心仰答赤子同患救世之意以自附于濂洛關閩之後者乎夫脩身見世砥行其本而著書立說不廢焉七篇尚矣韓子亦猶是也城不揣經史之閒小有誤述倘書成而行世非舉子業可例是或救世之一端也信去索報急對客伸楮語故不次惟嗣音是望

答皖撫鄭公搜關張文字書

承示蜀漢關張諸文字城寡學渺聞搜覽不多敬據一二

以復明問若關公告辭曹操書想久入胥鈔故不錄上然此書如日在天之上心在人之內數語真奇警武人有此非英雄不能或疑其偽作非也公鑒定以為何如關張諸銘不過數字按涪陵志宋大觀開掘地得印及佩鈎刁斗上刻張飛二字因立桓侯廟刁斗文似無全文具列以俟審定倘有續得當書油素上典記

再答鄭公書

近苦應酬未暇簡閱諸文字然如關公進玉璽箋雖繫節文楊用修古文韻語載之近梅禹金有辨要當過而存也又蜀廣記引碑目有桓侯與張遼書有目無文或當于蜀中古搨搜其全耳皆具如左

一關公進玉璽箋

璽潛漢水伏于淵泉暉景燭曜靈光徹天

見楊升菴古文韻語

妙二十三

五

一張公與張遼書

按碑目云閩中有張桓侯與張遼書石刻漢文八分書

見曹能始蜀廣記

答鄭公池州救荒書

池州土瘠田狹雖豐年所入合計之不足半歲之食仰給于江西湖廣及皖桐之米與穀從來久矣每年六月中客船銜尾至民賴濟焉今歲池州先水後旱高下皆災秋收所入又不及往歲之半而江廣始以寡收閉糴客船無至者于是穀少價增郡城十一月內遂至買稻一石用銀一金此池城數百年來未有之價也人心洶洶流言日布即城內富家之有穀者皆不敢留以買怨盡糶賣矣近者鋪戶無可買之家貧民無可糶之路每日鋪戶之門輒聚飢民十百持錢而來不能人人得米各鋪辰起開扉已後即無以應或閒有客船一

二皆小艇輕撓所受不多風帆乍泊頃刻立盡惟近水居民得之升合不能入郡城也至各鄉地遠法弛攘奪屢見白晝公行較之夜盜尤劇而要之實實無米為憂方大則郡城為甚為今之計急宜使鋪戶有米而買即價值甚昂不至坐斃則人心可安地方無事不然自今以迨明年麥秋尚在四月一春何以支持事在然眉非難逆親救荒拯溺不容須臾緩矣明問下及謹陳數事伏候裁擇施行 一募行戶市糶行戶所以不敢遠出買米者有二一為江廣遏糶一為舟行多盜夫南京兵部尚書李等久以通糶疏請矣若蒙憲臺一面移會江廣各院曉示地方凡有買米賈客聽其開船出坑無許市徒攔阻以抗明旨一面移檄沿江府州縣及哨禦官兵晝夜巡緝稻船所過儻有以失盜聞者該地方文武職官參劾提究一面檄行本府諭行戶聽彼自備資本各給府印批

妙三十三

夫

文前往有米處所市買先回者官給賞銀示勸再換印批往買總計往來多次米稻數倍者申院旌獎以示鼓舞如此則郡城不患無米而米多則價平又不必言矣 一察存留備稻本府原有倉稻備振既係錢糧豈容虛耗若蒙憲臺一面移會按院一面檄察本府預備倉歷年存稻若干變價存貯若干又前院史公存留餉稻若干變價買貯若干俱造確數文冊開報即將所存之粟或散賣貧民或總賣鋪戶變價若干同歷年支贖存留銀兩一并批給有力行戶聽其自往販買俟穀到賣完之日交還官銀原數庶行戶之資本益多則販賣益盛俟冬春足食之後方將此銀著令買穀貯倉以備異日此時但取隨買隨賣不許抑定賤價勒取官稻則行戶不以領銀為苦所以致米得多而前此官物亦不為雀鼠之耗實有振備之用矣 一行振濟實惠邇蒙本府印發募簿

勸輸備振本府首捐百金餘各輸俸有差鄉紳士民商賈等亦隨力書簿矣夫池瘠土之民不過涓滴之助此須實委職官擇某任使察劾支用凡持募積滑無許經手及此斷穀之時早為接濟之用古人云與之太晚亦不感恩是為無策矣

答張爾公書

城白辱惠長書以千子極口相詆而欲為芑山辯艾書者此自仁兄德業所繫弟何敢率然勸止然弟徐思之竊有以廣仁兄願試垂聽也弟卑之無高論姑就事切言之昔者陳羅章艾之見推于世愚知一辭無異議也自戊辰艾選論說出而天下之闕千子者十四五自四家摘繆出而天下之執手千子十八九矣豈非以其酷如介生大力者辭不雅馴誼微忠告天下之責所以四面至哉今又以加吾爾公平前次尾以東下故信宿敝廬適有持艾選來者兩人讀至例言刺心

妙二十三

十七

長喙殊不能已天下人情可見弟乃深為千子惜曰是再自毀也千子過計矣仁兄何庸辯為昔山谷謂東坡文章好罵自是一病夫東坡之罵豈如今日云爾哉而識者惜之使千子如是爾公尤而效之是爾公為千子分謗也其奚庸辯為弟巡覽仁兄文辯發明經傳崇尚理體功在後學多矣即甲戌文辯中指駁弟與次尾一字必嚴尤服古處或一二稍涉苛細非乖大義也若使顯以辯艾行之恐兩家憑氣波及作者深文刻論株連無已仁兄其何用此耶抑爾公之辯也謂千子能屈折我哉弟觀千子之言曰明知非某所評則是不謂所評是而辯之者之非也但以為非己評而已又曰文不雅馴者略之則是不抹者果不雅馴而不能謂辯之者之非是也千子之言已如此矣又何待爾公啾啾耶然此皆就事切言之者也天下之大未嘗無人理道之在天地間如衡量

繩墨多寡曲直不得意爲增損爾公千子有功有過有得有失以至功過之大小得失之厚薄絲髮杪忽都有定之者單辭盛氣繁言紙費皆無益事理又奚庸焉昔人謂盧仝茶歌到七椀亦應自止若復滾滾百千何極遠之朱陸異同近之李何推駁一再往復亦遂罷矣爾公已辯矣千子已答辯矣弟願兩家斬然遂止然請從爾公始且弟尤深自痛責者昔考亭嘗言歐公平日但做詩飲酒未嘗理會身心事夫文忠之文其于斯道何如者而文公云爾哉然則今日之文今日兩家之所辯爭毫末中毫末亦定非急矣言念至此吾黨固當汗下解紛已似舍己之田佐鬪更滋鄉鄰之害口語橫恣徒爲高人長者所笑則惑甚耳白門有吳次尾陳百史諸君子吳門有楊維斗錢吉士諸君子貴鄉有萬茂先陳士業左之諸君子仁兄幸一一商之知不卒卒成書也入山鍵戶

妙三十三

六

弟夙具此志誠有如仁兄所言者近觀情事計益決矣以承遠教辱仁兄骨肉我故率剖胸懷不覺媿媿幸投之破紙堆中不足爲外人道也伏惟仁兄裁察爲禱

